

卷之三

前漢書卷第七

昭帝紀七

孝昭皇帝武帝少子也母曰趙婕妤本以有奇異得幸及生帝亦奇異語在外戚傳武帝末戾太子敗燕王旦廣陵王胥行驕嫚後元二年二月上疾病遂立昭帝爲太子年八歲以侍中奉車都尉霍光爲大司馬大將軍受遺詔輔少主明日武帝崩戊辰太子卽皇帝位謁高廟帝姊鄂邑公主益湯沐邑爲長公主共養省中大將軍光秉政領尚書事車騎將軍金日磾左將軍上官桀副焉夏六月赦天下秋七月有星

前漢書 卷一
李于東方濟北王寬有罪自殺賜長公主及宗室昆弟各有差追尊趙婕妤爲皇太后起雲陵冬匈奴入朔方殺略吏民發軍屯西河左將軍桀行北邊公主始元元年春二月黃鵠下建章宮太掖池中公卿上壽賜諸侯王列侯宗室金錢各有差巳亥上耕于鉤盾弄田益封燕王廣陵王及鄂邑長公主各萬三千戶夏爲太后起園廟雲陵益州廉頭姑繒牂牁談指同並二十四邑皆反遣水衡都尉呂破胡募吏民及發犍爲蜀郡犇命擊益州大破之有司請河內屬冀州河東屬并州秋七月赦天下賜民百戶牛酒大雨

渭橋絕八月齊孝王孫劉澤謀反欲殺青州刺史雋不疑發覺皆伏誅遷不疑爲京兆尹賜錢百萬九月丙子車騎將軍日磾薨閏月遣故廷尉王平等五人持節行郡國舉賢良問民所疾苦冤失職者冬無冰二年春正月大將軍光左將軍桀皆以前捕斬反虜重合侯馬通功封光爲博陸侯桀爲安陽侯以宗室母在位者舉茂材劉辟彊劉長樂皆爲光祿大夫辟彊守長樂衛尉三月遣使者振貸貧民毋種食者秋八月詔曰往年災害多今年蠶麥傷所振貸種食勿收責毋令民出今年田租冬發習戰射士詣朔方調

前漢書 卷五
故吏將屯田張掖郡田賦之令皆遺使持節陝西
三年春二月有星孛于西北秋募民徙雲陵賜錢田
宅冬十月鳳皇集東海遣使者祠其處十一月壬辰
朔日有蝕之

四年春三月甲寅立皇后上官氏赦天下辭訟在後
二年前皆勿聽治夏六月皇后見高廟賜長公主丞
相將軍列侯中二千石以下及郎吏宗室錢帛各有
差徙三輔富人雲陵賜錢戶十萬秋七月詔曰比歲
不登民匱於食流庸未盡還往時令民共出馬其止
勿出諸給中都官者且減之冬遣大鴻臚田廣明擊

益州廷尉李种坐故縱死罪弃市

五年春正月追尊皇太后父爲順成侯夏陽男子張
延年詣北闕自稱衛太子誣罔要斬夏罷天下亭毋
馬及馬弩關六月封皇后父驃騎將軍上官安爲桑
樂侯詔曰朕以眇身獲保宗室戰戰栗栗夙興夜寐
修古帝王之事通保傳傳孝經論語尚書未云有明
其令三輔太常舉賢良各二人郡國文學高第各一
人賜中二千石以下至吏民爵各有差罷僮耳真番
郡秋大鴻臚廣明軍正王平擊益州斬首捕虜三萬
餘人獲畜產五萬餘頭

六年春正月上耕于上林二月詔有司問郡國所舉賢良文學民所疾苦議罷鹽鐵榷酤移中監蘇武前使匈奴留單于庭十九歲乃還奉使全節以武爲典屬國賜錢百萬夏旱大雩不得舉火秋七月罷榷酤官令民得以律占租賣酒升四錢以邊塞闊遠取天水隴西張掖郡各二縣置金城郡詔曰鉤町侯母波率其君長人民擊反者斬首捕虜有功其立母波爲鉤町王大鴻臚廣明將率有功賜爵關內侯食邑元鳳元年春長公主共養勞苦復以藍田益長公主湯沐邑泗水戴王前薨以母嗣國除後宮有遺腹子

煖相內史不奏言上聞而憐之立煖爲泗水王相內史皆下獄三月賜郡國所選有行義者涿郡韓福等五人帛人五十匹遣歸詔曰朕閔勞以官職之事其務修孝弟以教鄉里令郡縣常以正月賜羊酒有不幸者賜衣被一襲祠以中牢武都氐人反遣執金吾馬適建龍頡侯韓增大鴻臚廣明將三輔太常徒皆免刑擊之夏六月赦天下秋七月乙亥晦日有蝕之既八月改始元爲元鳳九月鄂邑長公主燕王旦與左將軍上官桀桀子票騎將軍安御史大夫桑弘羊皆謀反伏誅初桀安父子與大將軍光爭權欲害之

詐使人爲燕王旦上書言光罪時上年十四覺其詐後有譖光者上輒怒曰大將軍國家忠臣先帝所屬敢有譖毀者坐之光由是得盡忠語在燕王霍光傳冬十月詔曰左將軍安陽侯桀票騎將軍桑樂侯安御史大夫桑弘羊皆數以邪枉干輔政大將軍不聽而懷怨望與燕王通謀置驛往來相約結燕王遣壽西長孫縱之等賂遺長公主丁外人謁者杜延年大將軍長史公孫遺等交通私書共謀令長公主置酒伏兵殺大將軍光徵立燕王爲天子大逆母道故稻田使者燕倉先發覺以告大司農敞敞告諫大夫延

年延年以聞丞相徵事任宮手捕斬桀丞相少史王壽誘將安入府門皆已伏誅吏民得以安封延年倉宮壽皆爲列侯又曰燕王迷惑失道前與齊王子劉澤等爲逆抑而不揚望王反道自新今迺與長公主左將軍桀等謀危宗廟王及公主皆自伏辜其赦王太子建公主子文信及宗室子與燕王上官桀等謀反父母同產當坐者皆免爲庶人其吏爲桀等所誣誤未發覺在吏者除其罪

二年夏四月上自建章宮徙未央宮大置酒賜郎從官帛及宗室子錢人二十萬吏民獻牛酒者賜帛人

一匹六月赦天下詔曰朕閱百姓未贍前年減漕三百萬石頗省乘輿馬及苑馬呂補邊郡三輔傳焉其令郡國毋斂今年馬口錢三輔太常郡得以叔粟當賦

三年春正月泰山有大石自起立上林有柳樹枯僵自起生罷中牟苑賦貧民詔曰迺者民被水災頗匱於食朕虛倉廩使使者振困乏其止四年毋漕三年以前所振貸非丞相御史所請邊郡受牛者勿收責

夏四月少府徐仁廷尉王平左馮翊賈勝胡皆坐縱反者仁自殺平勝胡皆要斬冬遼東烏桓反以中郎

將范明友為度遼將軍將北邊七郡郡二千騎擊之

四年春正月丁亥帝加元服見于高廟賜諸侯王丞相大將軍列侯宗室下至吏民金帛牛酒各有差賜中二千石以下及天下民爵毋收四年五年口賦三年以前逋更賦未入者皆勿收令天下酺五日甲戌丞相千秋薨夏四月詔曰度遼將軍明友前以羌騎校尉將羌王侯君長以下擊益州反虜後復率擊武都反氏今破烏桓斬虜獲生有功其封明友為平陵侯平樂監傅介子持節使誅斬樓蘭王安歸首縣北關封義陽侯五月丁丑孝文廟正殿火上及羣臣皆

素服發中二千石將五校作治六日成太常及廟令丞郎吏皆劾大不敬會赦太常轅陽侯德免爲庶人六月赦天下

五年春正月廣陵王來朝益國萬一千戶賜錢二千萬黃金二百斤劔二安車一乘馬二駟夏大旱六月發三輔及郡國惡少年吏有告劾亡者屯遼東秋罷象郡分屬鬱林牂牁冬十一月大雷十二月庚戌丞相訴薨

六年春正月募郡國徒築遼東玄菟城夏赦天下詔曰夫穀賤傷農今三輔太常穀減賤其令以叔粟當今年賦右將軍張安世宿衛忠謹封富平侯烏桓復犯塞遣度遼將軍范明友擊之

元平元年春二月詔曰天下以農桑爲本日者省用罷不急官減外繇耕桑者益衆而百姓未能家給朕甚愍焉其減口賦錢有司奏請減什三上許之甲申晨有流星大如月衆星皆隨西行夏四月癸未帝崩于未央宮六月壬申葬平陵

贊曰昔周成以孺子繼統而有管蔡四國流言之變孝昭幼年卽位亦有燕蓋上官逆亂之謀成王不疑周公孝昭委任霍光各因其時以成名大矣哉承孝

前漢書 紀 卷八
武奢侈餘敝師旅之後海內虛耗戶口減半光知時
務之要輕繇薄賦與民休息至始元元鳳之間匈奴
和親百姓充實舉賢良文學問民所疾苦議鹽鐵而
罷權酷尊號曰昭不亦宜乎

前漢書卷第七

前漢書卷第八

宣帝紀八

孝宣皇帝武帝曾孫戾太子孫也太子納史良娣生
史皇孫皇孫納王夫人生宣帝號曰皇曾孫生數月
遭巫蠱事太子良娣皇孫王夫人皆遇害語在太子
傳曾孫雖在襁緥猶坐收繫郡邸獄而丙吉爲廷尉
監治巫蠱於郡邸憐曾孫之亡辜使女徒復作淮陽
趙徵卿涓城胡組更乳養私給衣食視遇甚有恩巫
蠱事連歲不決至後元二年武帝疾往來長楊五柞
宮望氣者言長安獄中有天子氣上遣使者分條中

前漢書 卷八
都官獄繫者輕重皆殺之內謁者令郭穰夜至郡邸
獄吉拒閉使者不得入曾孫賴吉得全因遭大赦吉
廼載曾孫送祖母史良娣家語在吉及外戚傳後有
詔掖庭養視上屬籍宗正時掖庭令張賀嘗事戾太
子思顧舊恩哀曾孫奉養甚謹以私錢供給教書旣
壯爲取暴室晉夫許廣漢女曾孫因依倚廣漢兄弟
及祖母家史氏受詩於東海復中翁高材好學然亦
喜游俠鬪雞走馬具知閭里奸邪吏治得失數上下
諸陵周徧三輔常困於蓮勺鹵中尤樂杜鄠之間率
常在下杜時會朝請舍長安尚冠里身足下有毛臥

居數有光耀每買餅所從買家輒大讎亦以是自怪
元平元年四月昭帝崩母嗣大將軍霍光請皇后徵
昌邑王六月丙寅王受皇帝璽綬尊皇后曰皇太后
癸巳光奏王賀淫亂請廢語在賀及光傳秋七月光
奏議曰禮人道親親故尊祖尊祖故敬宗大宗無嗣
擇支子孫賢者爲嗣孝武皇帝曾孫病已有詔掖庭
養視至今年十八師受詩論語孝經操行節儉慈仁
愛人可以嗣孝昭皇帝後奉承祖宗子萬姓奏可遣
宗正德至曾孫尚冠里舍洗沐賜御府衣太僕以軫
獵車奉迎曾孫就齊宗正府庚申入未央宮見皇太

前漢書 紀 卷八
后封爲陽武侯已而羣臣奏上璽綬卽皇帝位謁高廟八月己巳丞相敞薨九月大赦天下十一月壬子立皇后許氏賜諸侯王以下金錢至吏民鰥寡孤獨各有差皇太后歸長樂宮長樂宮初置屯衛

本始元年春正月募郡國吏民訾百萬以上徙平陵遣使者持節詔郡國二千石謹牧養民而風德化大將軍光稽首歸政上謙讓委任焉論定策功益封大將軍光萬七千戶車騎將軍光祿勳富平侯安世萬戶詔曰故丞相安平侯敞等居位守職與大將軍光車騎將軍安世建議定策以安宗廟功賞未加而薨

其益封敞嗣子忠及丞相陽平侯義度遼將軍平陵侯明友前將軍龍雒侯增太僕建平侯延年太常蒲侯昌諫大夫宜春侯譚當塗侯平杜侯屠耆堂長信少府關內侯勝邑戶各有差封御史大夫廣明爲昌水侯後將軍充國爲營平侯大司農延年爲陽城侯少府樂成爲爰氏侯光祿大夫遷爲平丘侯賜右扶風德典屬國武廷尉光宗正德大鴻臚賢詹事畸光祿大夫吉京輔都尉廣漢爵皆關內侯德武食邑夏四月庚午地震詔內郡國舉文學高第各一人五月鳳皇集膠東千乘赦天下賜吏二千石諸侯相下至

中都官宦吏六百石爵各有差自左更至五大夫賜天下人爵各一級孝者二級女子百戶牛酒租稅勿收六月詔曰故皇太子在湖未有號諡歲時祠其議諡置園邑語在太子傳秋七月詔立燕刺王太子建爲廣陽王立廣陵王胥少子弘爲高密王

二年春以水衡錢爲平陵徙民起第宅大司農陽城侯田延年有罪自殺夏五月詔曰朕以眇身奉承祖宗夙夜惟念孝武皇帝躬履仁義選明將討不服匈奴遠遁平氏羌昆明南越百蠻鄉風款塞來享建太學修郊祀定正朔協音律封泰山塞宣房符瑞應寶

鼎出白麟獲功德茂盛不能盡宣而廟樂未稱其議奏有司奏請宜加尊號六月庚午尊孝武廟爲世宗廟奏盛德文始五行之舞天子世世獻武帝巡狩所幸之郡國皆立廟賜民爵一級女子百戶牛酒匈奴數侵邊又西伐烏孫烏孫昆彌及公主因國使者上書言昆彌願發國精兵擊匈奴唯天子哀憐出兵以救公主秋大發興調關東輕車銳卒選郡國吏三百石伉健習騎射者皆從軍御史大夫田廣明爲祁連將軍後將軍趙克國爲蒲類將軍雲中太守田順爲虎牙將軍及度遼將軍范明友前將軍韓增凡五將

軍兵十五萬騎校尉常惠持節護烏孫兵咸擊匈奴
三年春正月癸亥皇后許氏崩戊辰五將軍師發長
安夏五月軍罷祁連將軍廣明虎牙將軍順有罪下
有司皆自殺校尉常惠將烏孫兵入匈奴右地大克
獲封列侯大旱郡國傷旱甚者民毋出租賦三輔民
就賤者且毋收事盡四年六月己丑丞相義薨
四年春正月詔曰蓋聞農者興德之本也今歲不登
已遣使者振貸困乏其令太官損膳省宰樂府減樂
人使歸就農業丞相以下至都官令丞上書入穀輸
長安倉助貸貧民民以車船載穀入關者得毋用傳

三月乙卯立皇后霍氏賜丞相以下至郎吏從官金
錢帛各有差赦天下夏四月壬寅郡國四十九地震
或山崩水出詔曰蓋災異者天地之戒也朕承洪業
奉宗廟託于士民之上未能和羣生迺者地震北海
琅邪壞祖宗廟朕甚懼焉丞相御史其與列侯中二
千石博問經學之士有以應變輔朕之不逮毋有所
諱令三輔太常內郡國舉賢良方正各一人律令有
可蠲除以安百姓條奏被地震壞敗甚者勿收租賦
大赦天下上以宗廟墮素服避正殿五日五月鳳皇
集北海安丘淳于秋廣川王吉有罪廢遷上庸自殺

前漢書 卷八
地節元年春正月有星孛于西方三月假郡國貧民
田夏六月詔曰蓋聞堯親九族以和萬國朕蒙遺德
奉承聖業惟念宗室屬未盡而以罪絕若有賢材改
行勸善其復屬使得自新冬十一月楚王延壽謀反
自殺十二月癸亥晦日有蝕之
二年春三月庚午大司馬大將軍光薨詔曰大司馬
大將軍博陸侯宿衛孝武皇帝三十餘年輔孝昭皇
帝十有餘年遭大難躬秉義率三公諸侯九卿大夫
定萬世策以安宗廟天下蒸庶咸以康寧功德茂盛
朕甚嘉之復其後世疇其爵邑世世母有所與功如

蕭相國夏四月鳳皇集魯郡羣鳥從之大赦天下五
月光祿大夫平丘侯王遷有罪下獄死上始親政事
又思報大將軍功德迺復使樂平侯山領尚書事而
令羣臣得奏封事以知下情五日一聽事自丞相以
下各奉職奏事以傳奏其言考試功能侍中尚書功
勞當遷及有異善厚加賞賜至于子孫終不改易樞
機周密品式備具上下相安莫有苟且之意也
三年春三月詔曰蓋聞有功不賞有罪不誅雖唐堯
猶不能以化天下今膠東相成勞來不怠流民自占
八萬餘口治有異等其秩成中二千石賜爵關內侯

前漢書 卷八
又曰鰥寡孤獨高年貧困之民朕所憐也前下詔假公田貸種食其加賜鰥寡孤獨高年帛二千石嚴敎吏謹視遇母令失職令內郡國舉賢良方正可親民者夏四月戊申立皇太子大赦天下賜御史大夫爵關內侯中二千石爵右庶長天下當爲父後者爵一級賜廣陵王黃金千斤諸侯王十五人黃金各百斤列侯在國者八十七人黃金各二十斤冬十月詔曰迺者九月壬申地震朕甚懼焉有能箴朕過失及賢良方正直言極諫之士以匡朕之不逮毋諱有司朕旣不德不能附遠是以邊境屯戍未息今復飭兵重

屯又勞百姓非所以綏天下也其罷車騎將軍右將軍屯兵又詔池籩未御幸者假與貧民郡國宮館勿復修治流民還歸者假公田貸種食且勿算事十一月詔曰朕旣不逮導民不明反側晨興念慮萬方不怠元元唯恐羞先帝聖德故竝舉賢良方正以親萬姓歷載臻茲然而俗化闕焉傳曰孝弟也者其爲仁之本與其令郡國舉孝弟有行義聞於鄉里者各一人十二月初置廷尉平四人秩六百石省文山郡并蜀

四年春二月封外祖母爲博平君故鄣侯蕭何曾孫

建世爲侯詔曰導民以孝則天下順今百姓或遭衰
經凶災而吏繇事使不得葬傷孝子之心朕甚憐之
自今諸有大父母父母喪者勿繇事使得收斂送終
盡其子道夏五月詔曰父子之親夫婦之道天姓也
雖有患禍猶蒙死而存之誠愛結於心仁厚之至也
豈能遺之哉自今子首匿父母妻匿夫孫匿大父母
皆勿坐其父母匿子夫匿妻大父母匿孫罪殊死皆
上請廷尉以聞立廣川惠王孫文爲廣川王秋七月
大司馬霍禹謀反詔曰廼者東織室令史張赦使魏
郡豪李竟報冠陽侯霍雲謀爲大逆朕以大將軍故

抑而不揚冀其自新今大司馬博陸侯禹與母宣成
侯夫人顯及從昆弟冠陽侯雲樂平侯山諸姊妹壻
度遼將軍范明友長信少府鄧廣漢中郎將任勝騎
都尉趙平長安男子馮殷等謀爲大逆顯前又使女
侍醫淳于衍進藥殺共哀后謀毒太子欲危宗廟逆
亂不道咸伏其辜諸爲霍氏所誣誤未發覺在吏者
皆赦除之八月己酉皇后霍氏廢九月詔曰朕惟百
姓失職不瞻遣使者循行郡國問民所疾苦吏或營
私煩擾不顧厥咎朕甚閔之今年郡國頗被水災已
振貸鹽民之食而賈咸貴衆庶重困其減天下鹽賈

前漢書 紀 卷 九
又曰令甲死者不可生刑者不可息此先帝之所重而吏未稱今繫者或以掠辜若飢寒瘦死獄中何用心逆人道也朕甚痛之其令郡國歲上繫囚以掠笞若瘦死者所坐名縣爵里丞相御史課殿最以聞十二月清河王年有罪廢遷房陵
元康元年春以杜東原上爲初陵更名杜縣爲杜陵徙丞相將軍列侯吏二千石訾百萬者杜陵三月詔曰廼者鳳皇集泰山陳留甘露降未央宮朕未能章先帝休烈協寧百姓承天順地調序四時獲蒙嘉瑞賜茲祉福夙夜兢兢靡有驕色內省匪解永惟罔極

書不云乎鳳皇來儀庶尹允諧其赦天下徒賜勤事吏中二千石呂下至六百石爵自中郎吏至五大夫佐史以上二級民一級女子百戶牛酒加賜鰥寡孤獨三老孝弟力田帛所振貸勿收夏五月立皇考廟益奉明園戶爲奉明縣復高皇帝功臣絳侯周勃等百三十六人家子孫令奉祭祀世世勿絕其母嗣者復其次秋八月詔曰朕不明六藝鬱于大道是以陰陽風雨未時其博舉吏民厥身修正通文學明於先王之術宣究其意者各二人中二千石各一人冬置建章衛尉

前漢書 卷八
二年春正月詔曰書云文王作罰刑茲無赦今吏修身奉法未有能稱朕意朕甚愍焉其赦天下與士大夫厲精更始二月乙丑立皇后王氏賜丞相以下至郎從官錢帛各有差三月以鳳皇甘露降集賜天下吏爵二級民一級女子百戶牛酒鰥寡孤獨高年帛夏五月詔曰獄者萬民之命所以禁暴止邪養育羣生也能使生者不怨死者不恨則可謂文吏矣今則不然用法或持巧心析律貳端深淺不平增辭飾非以成其罪奏不如實上亦亡繇知此朕之不明吏之不稱四方黎民將何仰哉二千石各察官屬勿用此

人吏務平法或擅興繇役飾厨傳稱過使客越職踰法以取名譽譬猶踐薄冰以待白日豈不殆哉今天下頗被疾疫之災朕甚愍之其令郡國被災甚者毋出今年租賦又曰聞古天子之名難知而易諱也今百姓多上書觸諱以犯罪者朕甚憐之其更諱詢諸觸諱在令前者赦之冬京兆尹趙廣漢有罪要斬三年春以神爵數集泰山賜諸侯王丞相將軍列侯二千石金郎從官帛各有差賜天下吏爵二級民一級女子百戶牛酒鰥寡孤獨高年帛三月詔曰蓋聞象有罪舜封之骨肉之親粲而不殊其封故昌邑王

前漢書 卷八
賀爲海昏侯又曰朕微眇時御史大夫丙吉中郎將
史曾史玄長樂衛尉許舜侍中光祿大夫許延壽皆
與朕有舊恩及故掖庭令張賀輔導朕躬修文學經
術恩惠卓異厥功茂焉詩不云乎無德不報封賀所
子弟子侍中中郎將彭祖爲陽都侯追賜賀諡曰陽
都哀侯吉曾玄舜延壽皆爲列侯故人下至郡邸獄
復作嘗有阿保之功皆受官祿田宅財物各以恩深
淺報之夏六月詔曰前年夏神爵集雍今春五色鳥
以萬數飛過屬縣翱翔而舞欲集未下其令三輔毋
得以春夏摘巢探卵彈射飛鳥具爲令立皇子欽爲

淮陽王

四年春正月詔曰朕惟耆老之人髮齒墮落血氣衰
微亦亾暴虐之心今或罹文法拘執囹圄不終天命
朕甚憐之自今以來諸年八十以上非誣告殺傷人
佗皆勿坐遣太中大夫彊等十二人循行天下存問
鰥寡覽觀風俗察吏治得失舉茂材異倫之士二月
河東霍徵史等謀反誅三月詔曰廼者神爵五采以
萬數集長樂未央北宮高寢甘泉泰畤殿中及上林
苑朕之不逮寡于德厚屢獲嘉祥非朕之任其賜天
下吏爵二級民一級女子百戶牛酒加賜三老孝弟

力田帛人二匹鰥寡孤獨各一匹秋八月賜故右扶
風尹翁歸子黃金百斤以奉其祭祀又賜功臣適後
黃金人二十斤丙寅大司馬衛將軍安世薨比年豐
穀石五錢

神爵元年春正月行幸甘泉郊泰畤三月行幸河東
祠后土詔曰朕承宗廟戰戰栗栗惟萬事統未燭厥
理迺元康四年嘉穀玄稷降于郡國神爵仍集金芝
九莖產于函德殿銅池中九真獻奇獸南郡獲白虎
威鳳爲寶朕之不明震于珍物飭躬齋精祈爲百姓
東濟大河天氣清靜神魚舞河幸萬歲宮神爵翔集

朕之不德懼不能任其以五年爲神爵元年賜天下
勤事吏爵二級民一級女子百戶牛酒鰥寡孤獨高
年帛所賑貸物勿收行所過毋出田租西羌反發三
輔中都官徒弛刑及應募飲飛射士羽林孤兒胡越
騎三河潁川沛郡淮陽汝南材官金城隴西天水安
定北地上郡騎士羌騎詣金城夏四月遣後將軍趙
克國彊弩將軍許延壽擊西羌六月有星孛于東方
卽拜酒泉太守辛武賢爲破羌將軍與兩將軍竝進
詔曰軍旅暴露轉輸煩勞其令諸侯王列侯蠻夷王
侯君長當朝二年者皆毋朝秋賜故大司農朱邑子

黃金百斤以奉祭祀後將軍克國言屯田之計語在克國傳

二年春二月詔曰迺者正月乙丑鳳皇甘露降集京師羣鳥從以萬數朕之不德屢獲天福祗事不怠其赦天下夏五月羌虜降服斬其首惡大豪楊玉茵非首置金城屬國以處降羌秋匈奴日逐王先賢揮將人衆萬餘來降使都護西域騎都尉鄭吉迎日逐破車師皆封列侯九月司隸校尉蓋寬饒有罪下有司自殺匈奴單于遣名王奉獻賀正月始和親

三年春起樂游苑三月丙午丞相薨秋八月詔曰吏不廉平則治道衰今小吏皆勤事而奉祿薄欲其毋侵漁百姓難矣其益吏百石以下奉十五四年春二月詔曰迺者鳳皇甘露降集京師嘉瑞竝見修興泰一五帝后土之祠祈爲百姓蒙祉福鸞鳳萬舉蜚覽翱翔集止于芴齋戒之暮神光顯著薦鬯之夕神光交錯或降于天或登于地或從四方來集于壇上帝嘉嚮海內承福其赦天下賜民爵一級女子百戶牛酒鰥寡孤獨高年帛夏四月潁川太守黃霸以治行尤異秩中二千石賜爵關內侯黃金百斤及潁川吏民有行義者爵人二級力田一級貞婦順

女帛令內郡國舉賢良可親民者各一人五月匈奴單于遣弟呼留若王勝之來朝冬十月鳳皇十一集杜陵十一月河南太守嚴延年有罪棄市十二月鳳皇集上林

五鳳元年春正月行幸甘泉郊泰畤皇太子冠皇太后賜丞相將軍列侯中二千石帛人百匹大夫人八十匹夫人六十匹又賜列侯嗣子爵五大夫男子爲父後者爵一級夏赦徒作杜陵者冬十二月乙酉朔日有蝕之左馮翊韓延壽有罪棄市

二年春三月行幸雍祠五畤夏四月己丑大司馬車

騎將軍增薨秋八月詔曰夫婚姻之禮人倫之大者也酒食之會所以行禮樂也今郡國二千石或擅爲苛禁禁民嫁娶不得具酒食相賀召由是廢鄉黨之禮令民亾所樂非所以導民也詩不云乎民之失德乾餱以愆勿行苛政冬十一月匈奴呼遼累單于帥衆來降封爲列侯十二月平通侯楊惲坐前爲光祿勳有罪免爲庶人不悔過怨望大逆不道要斬三年春正月癸卯丞相吉薨三月行幸河東祠后土詔曰往者匈奴數爲邊寇百姓被其害朕承至尊未能綏安匈奴虛間權渠單于請求和親病死右賢王

屠耆堂代立骨肉大臣立虛間權渠單于子爲呼韓
邪單于擊殺屠耆堂諸王竝自立分爲五單于更相
攻擊死者以萬數畜產大耗什八九人民飢餓相燔
燒以求食因大乖亂單于闕氏子孫昆弟及呼遼累
單于名王右伊秩訾且渠當戶以下將衆五萬餘人
來降歸義單于稱臣使弟奉珍朝賀正月北邊晏然
靡有兵革之事朕飭躬齋戒郊上帝祠后土神光竝
見或興于谷燭耀齊宮十有餘刻甘露降神爵集已
詔有司告祠上帝宗廟三月辛丑鸞鳳又集長樂宮
東闕中樹上飛下止地文章五色留十餘刻吏民竝

觀朕之不敏懼不能任婁蒙嘉瑞獲茲祉福書不云
乎雖休勿休祗事不怠公卿大夫其勗焉減天下口
錢赦殊死以下賜民爵一級女子百戶牛酒大酺五
日加賜鰥寡孤獨高年帛置西河北地屬國以處匈
奴降者

四年春正月廣陵王胥有罪自殺匈奴單于稱臣遣
弟谷蠡王入侍以邊塞亾寇減戍卒什二大司農中
丞耿壽昌奏設常平倉以給北邊省轉漕賜爵關內
侯夏四月辛丑晦日有蝕之詔曰皇天見異以戒朕
躬是朕之不逮吏之不稱也以前使使者問民所疾

苦復遣丞相御史掾一十四人循行天下舉冤獄察
擅爲苛禁深刻不改者

甘露元年春正月行幸甘泉郊泰畤匈奴呼韓邪單
于遣子右賢王銖婁渠堂入侍二月丁巳大司馬車
騎將軍延壽薨夏四月黃龍見新豐丙申太上皇廟
火甲辰孝文廟火上素服五日冬匈奴單于遣弟左
賢王來朝賀

二年春正月立皇子躡爲定陶王詔曰迺者鳳皇甘
露降集黃龍登興醴泉湧流枯槁榮茂神光竝見咸
受禎祥其赦天下減民算三十賜諸侯王丞相將軍

列侯中二千石金錢各有差賜民爵一級女子百戶
牛酒鰥寡孤獨高年帛夏四月遣護軍都尉祿將兵
擊珠崖秋九月立皇子宇爲東平王冬十二月行幸
荊陽宮屬玉觀匈奴呼韓邪單于款五原塞願奉國
珍朝三年正月詔有司議咸曰聖王之制施德行禮
先京師而後諸夏先諸夏而後夷狄詩云率禮不越
遂視旣發相土烈烈海外有截陛下聖德克塞天地
光被四表匈奴單于鄉風慕義舉國同心奉珍朝賀
自古未之有也單于非正朔所加王者所容也禮儀
宜如諸侯王稱臣昧死再拜位次諸侯王下詔曰蓋

前漢書 卷九
聞五帝三王禮所不施不及以政今匈奴單于稱北
藩臣朝正月朕之不逮德不能弘覆其以客禮待之
位在諸侯王上單于感風慕義舉國同心奉命
三年春正月行幸甘泉郊泰畤匈奴呼韓邪單于稽
侯獮來朝贊謁稱藩臣而不名賜以璽綬冠帶衣裳
安車駟馬黃金錦繡繒絮使有司道單于先行就邸
長安宿長平上自甘泉宿池陽宮上登長平阪詔單
于毋謁其左右當戶之羣皆列觀蠻夷君長王侯迎
者數萬人夾道陳上登渭橋咸稱萬歲單于就邸置
酒建章宮饗賜單于觀以珍寶二月單于罷歸遣長

樂衛尉高昌侯忠車騎都尉昌騎都尉虎將萬六千
騎送單于單于居幕南保光祿城詔北邊振穀食郵
支單于遠遁匈奴遂定詔曰廼者鳳皇集新蔡羣鳥
四面行列皆鄉鳳皇立以萬數其賜汝南太守帛百
匹新蔡長吏三老孝弟力田鰥寡孤獨各有差賜民
爵二級毋出今年租三月己丑丞相霸薨詔諸儒講
五經同異太子太傅蕭望之等平奏其議上親稱制
臨決焉廼立梁丘易太子太傅侯尚書穀梁春秋博士
冬烏孫公主來歸
四年夏廣川王海陽有罪廢遷房陵冬十月丁卯未

前漢書
卷八
央宮宣室閣火

黃龍元年春正月行幸甘泉郊泰畤匈奴呼韓邪單于來朝禮賜如初二月單于歸國詔曰蓋聞上古之治君臣同心舉措曲直各得其所是以上下和洽海內康平其德弗可及已朕旣不明數申詔公卿大夫務行寬大順民所疾苦將欲配三王之隆明先帝之德也今吏或以不禁姦邪爲寬大縱釋有罪爲不苛或以酷惡爲賢皆失其中奉詔宣化如此豈不繆哉方今天下少事繇役省減兵革不動而民多貧盜賊不止其咎安在上計簿具文而已務爲欺謾以避其

課三公不以爲意朕將何任諸請詔省卒徒自給者皆止御史察計簿疑非實者按之使真僞毋相亂三月有星孛于王良閣道入紫宮夏四月詔曰舉廉吏誠欲得其真也吏六百石位大夫有罪先請秩祿上通足以效其賢材自今以來毋得舉冬十二月甲戌帝崩于未央宮癸巳尊皇太后曰太皇太后

贊曰孝宣之治信賞必罰綜核名實政事文學法理之士咸精其能至于技巧工匠器械自元成間鮮能及之亦足以知吏稱其職民安其業也遭值匈奴乖亂推亡固存信威北夷單于慕義稽首稱藩功光祖

前漢書卷第八
宗業垂後嗣可謂中興侔德殷宗周宣矣

前漢書卷第八

前漢書卷第九

元帝紀九

孝元皇帝宣帝太子也母曰共哀許皇后宣帝微時
生民間年二歲宣帝卽位八歲立爲太子壯大柔仁
好儒見宣帝所用多文法吏以刑名繩下大臣楊惲
蓋寬饒等坐刺譏辭語爲罪而誅嘗侍燕從容言陛
下持刑太深宜用儒生宣帝作色曰漢家自有制度
本以霸王道雜之柰何純任德教用周政乎且俗儒
不達時宜好是古非今使人眩於名實不知所守何
足委任廼歎曰亂我家者太子也繇是疏太子而愛

前漢書 卷九
淮陽王曰淮陽王明察好法宜爲吾子而王母張婕
妤尤幸上有意欲用淮陽王代太子然以少依許氏
俱從微起故終不背焉黃龍元年十二月宣帝崩癸
巳太子卽皇帝位謁高廟尊皇太后曰太皇太后皇
后曰皇太后

初元元年春正月辛丑孝宣皇帝葬杜陵賜諸侯王
公主列侯黃金吏二千石以下錢帛各有差大赦天
下三月封皇太后兄侍中中郎將王舜爲安平侯丙
午立皇后王氏以三輔太常郡國公田及苑可省者
振業貧民貲不滿千錢者賦貸種食封外祖父平恩

戴侯同產弟子中常侍許嘉爲平恩侯奉戴侯後夏
四月詔曰朕承先帝之聖緒獲奉宗廟戰戰兢兢間
者地數動而未靜懼於天地之戒不知所繇方田作
時朕憂蒸庶之失業臨遣光祿大夫褒等十二人循
行天下存問耆老鰥寡孤獨困乏失職之民延登賢
俊招顯側陋因覽風俗之化相守二千石誠能正躬
勞力宣明教化以親萬姓則六合之內和親庶幾虜
無憂矣書不云乎股肱良哉庶事康哉布告天下使
明知朕意又曰關東今年穀不登民多困乏其令郡
國被災害甚者毋出租賦江海陂湖園池屬少府者

前漢書 卷九
以假貧民勿租賦賜宗室有屬籍者馬一匹至二駟
三老孝者帛五匹弟者力田三匹鰥寡孤獨二匹吏
民五十戶牛酒六月以民疾疫令大官損膳減樂府
員省苑馬以振困乏秋八月上郡屬國降胡萬餘人
亡入匈奴九月關東郡國十一大水飢或人相食轉
旁郡錢穀以相救詔曰間者陰陽不調黎民飢寒無
以保治惟德淺薄不足以克入舊貫之居其令諸宮
館希御幸者勿繕治太僕減穀食馬水衡省肉食獸
二年春正月行幸甘泉郊泰畤賜雲陽民爵一級女
子百戶牛酒立弟竟爲清河王三月立廣陵厲王太

子霸爲王詔罷黃門乘輿狗馬水衡禁園宜春下苑
少府飲飛外池嚴籓池田假與貧民詔曰蓋聞賢聖
在位陰陽和風雨時日月光星辰靜黎庶康寧考終
厥命今朕恭承天地託于公侯之上明不能燭德不
能綏災異竝臻連年不息乃二月戊午地震于隴西
郡毀落太上皇廟殿壁木飾壞敗獠道縣城郭官寺
及民室屋壓殺人衆山崩地裂水泉涌出天惟降災
震驚朕師治有大虧咎至於斯夙夜兢兢不通大變
深惟鬱悼未知其序間者歲數不登元元困乏不勝
飢寒以陷刑辟朕甚閔之郡國被地動災甚者無出

租賦赦天下有可蠲除減省以便萬姓者條奏毋有
所諱丞相御史中二千石舉茂材異等直言極諫之
士朕將親覽焉夏四月丁巳立皇太子賜御史大夫
爵關內侯中二千石右庶長天下當爲父後者爵一
級列侯錢各二十萬五大夫十萬六月關東飢齊地
人相食秋七月詔曰歲比災害民有菜色慘怛於心
已詔吏虛倉廩開府庫振救賜寒者衣今秋禾麥頗
傷一年中地再動北海水溢流殺人民陰陽不和其
咎安在公卿將何以憂之其悉意陳朕過靡有所諱
冬詔曰國之將興尊師而重傅故前將軍望之傳朕

八年道以經書厥功茂焉其賜爵關內侯食邑八百
戶朝朔望十二月中書令弘恭石顯等譖望之令殺
○三年春令諸侯相位在郡守下珠厓郡山南縣反
博謀羣臣待詔賈捐之以爲宜棄珠厓救民饑饉乃
罷珠厓夏四月乙未晦茂陵白鶴館災詔曰迺者火
災降於孝武園館朕戰栗恐懼不燭變異咎在朕躬
羣司又未肯極言朕過以至於斯將何以寤焉百姓
仍遭凶阨無以相振加以煩擾虐苛吏拘牽虐微文
不得求終性命朕甚閔焉其赦天下夏旱立長沙煬
王弟宗爲王封故海昏侯賀子代宗爲侯六月詔曰

蓋聞安民之道本繇陰陽間者陰陽錯謬風雨不時朕之不德庶幾羣公有敢言朕之過者今則不然媮合苟從未肯極言朕甚閔焉永惟蒸庶之飢寒遠離父母妻子勞於非業之作衛於不居之官恐非所以佐陰陽之道也其罷甘泉建章宮衛令就農百官各省費條奏母有所諱有司勉之母犯四時之禁丞相御史舉天下明陰陽災異者各三人於是言事者衆或進擢召見人人自以得上意

四年春正月行幸甘泉郊泰畤三月行幸河東祠后土赦汾陰徒賜民爵一級女子百戶牛酒鰥寡高年

帛行所過無出租賦

五年春正月以周子南君爲周承休侯位次諸侯王三月行幸雍祠五畤夏四月有星孛于參詔曰朕之不逮序位不明衆僚久慮未得其人元元失望上感皇天陰陽爲變咎流萬民朕甚懼之廼者關東連遭災害飢寒疾疫夭不終命詩不云乎凡民有喪匍匐救之其令大官母日殺所具各減半乘輿秣馬無乏正事而已罷角抵上林宮館希御幸者齊三服官北假田官鹽鐵官常平倉博士弟子母置員以廣學者賜宗室子有屬籍者馬一匹至二駟三老孝者帛人

五匹弟者力田三匹鰥寡孤獨二匹吏民五十戶牛
酒省刑罰七十餘事除光祿大夫以下至郎中保父
母同產之令令從官給事官司馬中者得爲大父母
父母兄弟通籍冬十二月丁未御史大夫貢禹卒衛
司馬谷吉使匈奴不還

永光元年春正月行幸甘泉郊泰畤赦雲陽徒賜民
爵一級女子百戶牛酒高年帛行所過母出租賦二
月詔丞相御史舉質樸敦厚遜讓有行者光祿歲以
此科第郎從官三月詔曰五帝三王任賢使能以登
至平而今不治者豈斯民異哉咎在朕之不明亡以

知賢也是故壬人在位而吉士雍蔽重以周秦之弊
民漸薄俗去禮義觸刑法豈不哀哉繇此觀之元元
何辜其赦天下令厲精自新各務農畝無田者皆假
之貸種食如貧民賜吏六百石以上爵五大夫勤事
吏二級爲父後者民一級女子百戶牛酒鰥寡孤獨
高年帛是月雨雷隕霜傷麥稼秋罷

二年春二月詔曰蓋聞唐虞象刑而民不犯殷周法
行而姦軌服今朕獲承高祖之洪業託位公侯之上
夙夜戰栗永惟百姓之急未嘗有忘焉然而陰陽未
調三光晻昧元元大困流散道路盜賊竝興有司又

前漢書 卷九
長殘賊失牧民之術是皆朕之不明政有所虧咎至於此朕甚自耻爲民父母若是之薄謂百姓何其大赦天下賜民爵一級女子百戶牛酒鰥寡孤獨高年三老孝弟力田帛又賜諸侯王公主列侯黃金中二千石以下至中都官長吏各有差吏六百石以上爵五大夫勤事吏各二級三月壬戌朔日有蝕之詔曰朕戰戰栗栗夙夜思過失不敢荒寧惟陰陽不調未燭其咎婁敕公卿日望有效至今有司執政未得其中施與禁切未合民心暴猛之俗彌長和睦之道日衰百姓愁苦靡所錯躬是以氛邪歲增侵犯太陽正

氣湛掩日久奪光迺壬戌日有蝕之天見大異以戒朕躬朕甚悼焉其令內郡國舉茂材異等賢良直言之士各一人夏六月詔曰間者連年不收四方咸困元元之民勞於耕耘又亡成功困於飢饉亡以相救朕爲民父母德不能覆而有其刑甚自傷焉其赦天下秋七月西羌反遣右將軍馮奉世擊之八月以太常任千秋爲奮威將軍別將五校並進

三年春西羌平軍罷三月立皇子康爲濟陽王夏四月癸未大司馬車騎將軍接薨冬十一月詔曰迺者已丑地動中冬雨水大霧盜賊竝起吏何不以時禁

前漢書
各悉意對冬復鹽鐵官博士弟子員以用度不足民
多復除無以給中外繇役

四年春二月詔曰朕承至尊之重不能燭理百姓婁
遭凶咎加以邊竟不安師旅在外賦歛轉輸元元騷
動窮困亡聊犯法抵罪夫上失其道而繩下以深刑
朕甚痛之其赦天下所貸貧民勿收責三月行幸雍
祠五時夏六月甲戌孝宣園東闕災戊寅晦日有蝕
之詔曰蓋聞明王在上忠賢布職則羣生和樂方外
蒙澤今朕掩于王道夙夜憂勞不通其理靡瞻不眩
靡聽不惑是以政令多還民心未得邪說空進事亡

成功此天下所著聞也公卿大夫好惡不同或緣姦
作邪侵削細民元元安所歸命哉迺六月晦日有蝕
之詩不云乎今此下民亦孔之哀自今以來公卿大
夫其勉思天戒慎身修永以輔朕之不逮直言盡意
無有所諱九月戊子罷衛思后園及戾園冬十月乙
丑罷祖宗廟在郡國者諸陵分屬三輔以渭城壽陵
亭部原上爲初陵詔曰安土重遷黎民之性骨肉相
附人情所願也頃者有司緣臣子之義奏徙郡國民
以奉園陵令百姓遠棄先祖墳墓破業失產親戚別
離人懷思慕之心家有不安之意是以東垂被虛耗

前漢書 卷之八
之害關中有無聊之民非久長之策也詩不云乎民亦勞止迄可小康惠此中國以綏四方今所爲初陵者勿置縣邑使天下咸安土樂業亡有動搖之心布告天下令明知之又罷先后父母奉邑

五年春正月行幸甘泉郊泰畤三月上幸河東祠后土秋潁川水出流殺人民吏從官縣被害者與告士卒遣歸冬上幸長楊射熊館布車騎大獵十二月乙酉毀太上皇孝惠皇帝寢廟園

建昭元年春三月上幸雍祠五時秋八月有白蛾羣飛蔽日從東都門至枳道冬河間王元有罪廢遷房

陵罷孝文太后孝昭太后寢園

二年春正月行幸甘泉郊泰畤三月行幸河東祠后土益三河郡太守秩戶十二萬爲大郡夏四月赦天下六月立皇子興爲信都王閏月丁酉太皇太后上官氏崩冬十一月齊楚地震大雨雪樹折屋壞淮陽王舅張博魏郡太守京房坐窺道諸侯王以邪意漏泄省中語博要斬房棄市

三年夏令三輔都尉大郡都尉秩皆二千石六月甲辰丞相玄成薨秋使護西域騎都尉甘延壽副校尉陳湯橋發戊巳校尉屯田吏士及西域胡兵攻郅支

單于冬斬其首傳詣京師縣蠻夷邸門

四年春正月以誅郅支單于告祠郊廟赦天下羣臣上壽置酒以其圖書示後宮貴人夏四月詔曰朕承先帝之休烈夙夜栗栗懼不克任間者陰陽不調五行失序百姓飢饉惟烝庶之失業臨遣諫大夫博士賞等二十一人循行天下存問耆老鰥寡孤獨乏困失職之人舉茂材特立之士相將九卿其帥意毋怠使朕獲觀教化之流焉六月甲申中山王竟薨藍田地沙石雍霸水安陵岸崩雍涇水水逆流

五年春三月詔曰蓋聞明王之治國也明好惡而定去就崇敬讓而民興行故法設而民不犯令施而民從今朕獲保宗廟兢兢業業匪敢懈怠德薄明晻教化淺微傳不云虜百姓有過在予一人其赦天下賜民爵一級女子百戶牛酒三老孝弟力田帛又曰方春農桑興百姓勩力自盡之時也故是月勞農勸民無使後時今不良之吏覆案小罪徵召證案興不急之事以妨百姓使失一時之作亡終歲之功公卿其明察申敕之夏六月庚申復戾園壬申晦日有蝕之秋七月庚子復太上皇寢廟園原廟昭靈后武哀王昭哀后衛思后園

竟寧元年春正月匈奴虜韓邪單于來朝詔曰匈奴
郅支單于背叛禮義既伏其辜虜韓邪單于不忘恩
德鄉慕禮義復修朝賀之禮願保塞傳之無窮邊垂
長無兵革之事其改元爲竟寧賜單于待詔掖庭王
檣爲闕氏皇太子冠賜列侯嗣子爵五大夫天下爲
父後者爵一級二月御史大夫延壽卒三月癸未復
孝惠皇帝寢廟園孝文太后孝昭太后寢園夏封騎
都尉甘延壽爲列侯賜副校尉陳湯爵關內侯黃金
百斤夏五月壬辰帝崩于未央宮毀太上皇孝惠孝
景皇帝廟罷孝文孝昭太后昭靈后武哀王昭哀后

寢園秋七月丙戌葬渭陵

贊曰臣外祖兄弟爲元帝侍中語臣曰元帝多材藝
善史書鼓琴瑟吹洞簫自度曲被歌聲分判節度窮
極幼眇少而好儒及卽位徵用儒生委之以政貢薛
韋匡迭爲宰相而上牽制文義優游不斷孝宣之業
哀焉然寬弘盡下出於恭儉號令溫雅有古之風烈

前漢書卷第九

前漢書卷第十

成帝紀十

孝成皇帝元帝太子也母曰王皇后元帝在太子宮
生甲觀畫堂爲世嫡皇孫宣帝愛之字曰太孫常置
左右年三歲而宣帝崩元帝卽位帝爲太子壯好經
書寬博謹慎初居桂宮上嘗急召太子出龍樓門不
敢絕馳道西至直城門得絕乃度還入作室門上遲
之問其故以狀對上大說乃著令令太子得絕馳道
云其後幸酒樂燕樂上不以爲能而定陶恭王有材
藝母傳昭儀又愛幸上以故常有意欲以恭王爲嗣

前漢書 卷一百一十五
賴侍中史丹護太子家輔助有力上亦以先帝尤愛
太子故得無廢竟寧元年五月元帝崩六月己未太
子卽皇帝位謁高廟尊皇太后曰太皇太后皇后曰
皇太后以元舅侍中衛尉陽平侯王鳳爲大司馬大
將軍領尚書事乙未有所言乘輿車牛馬禽獸皆非
禮不宜以葬奏可七月大赦天下

建始元年春正月乙丑皇曾祖悼考廟災立故河間
王弟上郡庫令良爲王有星孛于營室罷上林詔獄
二月右將軍長史姚尹等使匈奴還去塞百餘里暴
風火發燒殺尹等七人賜諸侯王丞相將軍列侯王

太后公主王主吏二千石黃金宗室諸官吏千石以
下至二百石及宗室子有屬籍者三老孝弟力田鰥
寡孤獨錢帛各有差吏民五十戶牛酒詔曰迺者火
災降於祖廟有星孛于東方始正而虧咎孰大焉書
云惟先假王正厥事羣公孜孜帥先百寮輔朕不逮
崇寬大長和睦凡事恕已母行苛刻其大赦天下使
賜舅王譚商立根逢時爵關內侯夏四月黃霧四塞
博問公卿大夫無有所諱六月有青蠅無萬數集未
央宮殿中朝者坐秋罷上林宮館希御幸者二十五

前漢書 卷之四
所八月有兩月相承晨見東方九月戊子流星光燭地長四五丈委曲蛇形貫紫宮十二月作長安南北郊罷甘泉汾陰祠是日大風拔甘泉時中大木十韋以上郡國被災什四以上毋收田租
二年春正月罷雍五時辛巳上始郊祀長安南郊詔曰廼者徙泰畤后土于南郊北郊朕親飭躬郊祀上帝皇天報應神光竝見三輔長無共張繇役之勞赦奉郊縣長安長陵及中都官耐罪徒減天下賦錢算四十閏月以渭城延陵亭部爲初陵二月詔三輔內郡舉賢良方正各一人二月北宮井水溢出辛丑上

始祠后土于北郊丙午立皇后許氏罷六廡技巧官夏大旱東平王宇有罪削樊亢父縣秋罷太子博望苑以賜宗室朝請者減乘輿廐馬

三年春三月赦天下徒賜孝弟力田爵二級諸逋租賦所振貸勿收秋關內大水七月虎上小女陳持弓聞大水至走入橫城門闌入尚方掖門至未央宮鉤盾中吏民驚上城九月詔曰廼者郡國被水災流殺人民多至千數京師無故訛言大水至吏民驚恐奔走乘城殆苛暴深刻之吏未息元元寃失職者衆遣諫大夫林等循行天下冬十二月戊申朔日有蝕之

前漢書 卷三
夜地震未央宮殿中詔曰蓋聞天生衆民不能相治
爲之立君以統理之君道得則草木昆蟲咸得其所
人君不德謫見天地災異婁發以告不治朕涉道日
寡舉錯不中乃戊申日蝕地震朕甚懼焉公卿其各
思朕過失明白陳之女無面從退有後言丞相御史
與將軍列侯中二千石及內郡國舉賢良方正能直
言極諫之士詣公車朕將覽焉越雋山崩

四年春罷中書宦官初置尚書員五人夏四月雨雪
五月中謁者丞陳臨殺司隸校尉轅豐於殿中秋桃
李實大水河決東郡金隄冬十月御史大夫尹忠以

河決不憂職自殺

河平元年春三月詔曰河決東郡流漂二州校尉王
延世隄塞輒平其改元爲河平賜天下吏民爵各有
差夏四月巳亥晦日有蝕之旣詔曰朕獲保宗廟戰
戰栗栗未能奉稱傳曰男教不修陽事不得則日爲
之蝕天著厥異辜在朕躬公卿大夫其勉悉心以輔
不逮百寮各修其職惇任仁人退遠殘賊陳朕過失
無有所諱大赦天下六月罷典屬國并大鴻臚秋九
月復太上皇寢廟園
二年春正月沛郡鐵官冶鐵飛語在五行志夏六月

前漢書 卷一百一十五
封舅譚商立根逢時皆爲列侯

三年春二月丙戌犍爲地震山崩雍江水水逆流秋八月乙卯晦日有蝕之光祿大夫劉向校中祕書謁者陳農使使求遺書於天下

四年春正月匈奴單于來朝赦天下徒賜孝弟力田爵二級諸逋租賦所振貸勿收二月單于罷歸國三月癸丑朔日有蝕之遣光祿大夫博士嘉等十一人行舉瀕河之郡水所毀傷困乏不能自存者財振貸其爲水所流壓死不能自葬令郡國給椁槨葬埋已葬者與錢人二千避水它郡國在所冗食之謹遇以

文理無令失職舉惇厚有行能直言之士壬申長陵臨涇岸崩雍涇水夏六月庚戌楚王賢薨山陽火生石中改元爲陽朔

陽朔元年春二月丁未晦日有蝕之三月赦天下徒冬京兆尹王章有罪下獄歿

二年春寒詔曰昔在帝堯立羲和之官命以四時之事令不失其序故書云黎民於蕃時雍明以陰陽爲本也今公卿大夫或不信陰陽薄而小之所奏請多違時政傳以不知周行天下而欲望陰陽和調豈不謬哉其務順四時月令三月大赦天下夏五月除吏

八百石五百石秩秋關東大水流民欲入函谷天井
壺口五阮關者勿苛留遣諫大夫博士分行視八月
甲申定陶王康薨九月奉使者不稱詔曰古之立太
學將以傳先王之業流化於天下也儒林之官四海
淵原宜皆明於古今溫故知新通達國體故謂之博
士否則學者無述焉爲下所輕非所以尊道德也工
欲善其事必先利其器丞相御史其與中二千石二
千石雜舉可克博士位者使卓然可觀是歲御史大
夫張忠卒

三年春三月壬戌隕石東郡八夏六月潁川鐵官徒

申屠聖等百八十人殺長吏盜庫兵自稱將軍經歷
九郡遣丞相長史御史中丞逐捕以軍興從事皆伏
辜秋八月丁巳大司馬大將軍王鳳薨

四年春正月詔曰夫洪範八政以食爲首斯誠家給
刑錯之本也先帝劬農薄其租稅寵其強力令與孝
弟同科間者民彌惰怠鄉本者少趨末者衆將何以
矯之方東作時其令二千石勉勸農桑出入阡陌致
勞來之書不云乎服田力耜乃亦有秋其勗之哉二
月赦天下秋九月壬申東平王宇薨閏月壬戌御史
大夫于永卒

鴻嘉元年春二月詔曰朕承天地獲保宗廟明有所蔽德不能綏刑罰不中衆寃失職趨闕告訴者不絕是以陰陽錯謬寒暑失序日月不光百姓蒙辜朕甚閔焉書不云乎卽我御事罔克耆壽咎在厥躬方春生長時臨遣諫大夫理等舉三輔三河弘農寃獄公卿大夫部刺史明申敕守相稱朕意焉其賜天下民爵一級女子百戶牛酒加賜鰥寡孤獨高年帛逋貸未入者勿收壬午行幸初陵赦作徒以新豐戲鄉爲昌陵縣奉初陵賜百戶牛酒上始爲微行出冬黃龍見真定

二年春行幸雲陽三月博士行飲酒禮有雉蜚集王庭歷階升堂而雉後集諸府又集承明殿詔曰古之選賢傳納以言明試以功故官無廢事下無逸民教化流行風雨和時百穀用成衆庶樂業咸以康寧朕承鴻業十有餘年數遭水旱疾疫之災黎民婁困於飢寒而望禮義之興豈不難哉朕旣無以率道帝王之道日以陵夷意廼招賢選士之路鬱滯而不通與將舉者未得其人也其舉敦厚有行義能直言者冀聞切言嘉謀匡朕之不逮夏徙郡國豪桀貲五百萬以上五千戶于昌陵賜丞相御史將軍列侯公主中

二千石冢地第宅六月立中山憲王孫雲客爲廣德王

三年夏四月赦天下令吏民得買爵賈級千錢太旱秋八月乙卯孝景廟闕災冬十一月甲寅皇后許氏廢廣漢男子鄭躬等六十餘人攻官寺篡囚徒盜庫兵自稱山君

四年春正月詔曰數敕有司務行寬大而禁苛暴訖今不改一人有辜舉宗拘繫農民失業怨恨者衆傷害和氣水旱爲災關東流冗者衆青幽冀部尤劇朕甚痛焉未聞在位有惻然者孰當助朕憂之已遣使

者循行郡國被災害什四以上民貲不滿三萬勿出租賦逋貸未入皆勿收流民欲入關輒籍內所之郡國謹遇以理務有以全活之思稱朕意秋渤海清河河溢被災者振貸之冬廣漢鄭躬等黨與寘廣犯歷四縣衆且萬人拜河東都尉趙護爲廣漢太守發郡中及蜀郡合三萬人擊之或相捕斬除罪旬月平遷護爲執金吾賜黃金百斤

永始元年春正月癸丑太官凌室火戊午戾后園闕火夏四月封婕妤趙氏父臨爲成陽侯五月封舅曼子侍中騎都尉光祿大夫王莽爲新都侯六月丙寅

立皇后趙氏大赦天下秋七月詔曰朕執德不固謀
不盡下過聽將作大匠萬年言昌陵三年可成作治
五年中陵司馬殿門內尚未加功天下虛耗百姓罷
勞客土䟽惡終不可成朕惟其難怛然傷心夫過而
不改是謂過矣其罷昌陵及故陵勿徙吏民今天下
母有動搖之心立城陽孝王子俚爲王八月丁丑太
皇太后王氏崩

二年春正月己丑大司馬車騎將軍王音薨二月癸
未夜星隕如雨乙酉晦日有蝕之詔曰乃者龍見于
東萊日有蝕之天著變異以顯朕郵朕甚懼焉公卿

申敕百寮深思天誠有可省減便安百姓者條奏所
振貸貧民勿收又曰關東比歲不登吏民以義收食
貧民入穀物助縣官振贍者已賜直其百萬以上加
賜爵右更欲爲吏補三百石其吏也遷二等三十萬
以上賜爵五大夫吏亦遷二等民補郎十萬以上家
無出租賦三歲萬錢以上一年冬十一月行幸雍祠
五時十二月詔曰前將作大匠萬年知昌陵卑下不
可爲萬歲居奏請營作建置郭邑妄爲巧詐積土增
高多賦歛繇役興卒暴之作卒徒蒙辜死者連屬百
姓罷極天下匱竭常侍閣前爲大司農中丞數奏昌

陵不可成侍中衛尉長數白宜早止徙家及故處朕以長言下閣章公卿議者皆合長計首建至策閣典主省大費民以康寧閣前賜爵關內侯黃金百斤其賜長爵關內侯食邑千戶閣五百戶萬年佞邪不忠毒流衆庶海內怨望至今不息雖蒙赦令不宜居京師其徙萬年敦煌郡是歲御史大夫王駿卒三年春正月己卯晦日有蝕之詔曰天災仍重朕甚懼焉惟民之失職臨遣太中大夫嘉等循行天下存問耆老民所疾苦其與部刺史舉惇樸遜讓有行義者各一人冬十月庚辰皇太后詔有司復甘泉泰畤

汾陰后土雍五畤陳倉陳寶祠語在郊祀志十一月尉氏男子樊竝等十三人謀反殺陳留太守劫略吏民自稱將軍徒李譚等五人共格殺竝等皆封爲列侯十二月山陽鐵官徒蘇令等二百二十八人攻殺長吏盜庫兵自稱將軍經歷郡國十九殺東郡太守汝南都尉遣丞相長史御史中丞持節督趣逐捕汝南太守嚴訢捕斬今等遷訢爲大司農賜黃金百斤四年春正月行幸甘泉郊泰畤神光降集紫殿大赦天下賜雲陽吏民爵女子百戶牛酒鰥寡孤獨高年帛三月行幸河東祠后土賜吏民如雲陽行所過無

前漢書 卷之六
出山租夏四月癸未長樂臨華殿未央宮東司馬門
皆災六月甲午霸陵園門闕災出杜陵諸未嘗御者
歸家詔曰迺者地震京師火災屢降朕甚懼之有司
其悉心明對厥咎朕將親覽焉又曰聖王明禮制以
序尊卑異車服以章有德雖有其財而無其尊不得
踰制故民興行上義而下利方今世俗奢僭罔極靡
有厭足公卿列侯親屬近臣四方所則未聞修身遵
禮同心憂國者也或迺奢侈逸豫務廣第宅治園池
多畜奴婢被服綺縠設鐘鼓備女樂車服嫁娶葬埋
過制吏民慕效寢以成俗而欲望百姓儉節家給人

足豈不難哉詩不云乎赫赫師尹民具爾瞻其申敕
有司以漸禁之青綠民所常服且勿止列侯近臣各
自省改司隸校尉察不變者秋七月辛未晦日有蝕
之

元延元年春正月己亥朔日有蝕之三月行幸雍祠
五時夏四月丁酉無雲有雷聲光耀耀四面下至地
昏止赦天下秋七月有星孛于東井詔曰迺者日蝕
星隕謫見于天大異重仍在位默然罕有忠言今孛
星見于東井朕甚懼焉公卿大夫博士議郎其各悉
心惟思變意明以經對無有所諱與內郡國舉方正

能直言極諫者各一人北邊二十二郡舉勇猛知兵法者各一人封蕭相國後喜爲鄣侯冬十二月辛亥大司馬大將軍王商薨是歲昭儀趙氏害後宮皇子二年春正月行幸甘泉郊泰時三月行幸河東祠后土夏四月立廣陵孝王子守爲王冬行幸長楊宮從胡客大校獵宿萑陽宮賜從官

三年春正月丙寅蜀郡岷山崩雍江三日江水竭二月封侍中衛尉淳于長爲定陵侯三月行幸雍祠五時

四年春正月行幸甘泉郊泰時二月罷司隸校尉官

三月行幸河東祠后土甘露降京師賜長安民牛酒綏和元年春正月大赦天下二月癸丑詔曰朕承太祖鴻業奉宗廟二十五年德不能綏理宇內百姓怨望者衆不蒙天祐至今未有繼嗣天下無所繫心觀于往古近事之戒禍亂之萌皆由斯焉定陶王欣於朕爲子慈仁孝順可以承天序繼祭祀其立欣爲皇太子封中山王舅諫大夫馮參爲宜鄉侯益中山國三萬戶以慰其意賜諸侯王列侯金天下當爲父後者爵三老孝弟力田帛各有差又曰蓋聞王者必存二王之後所以通三統也昔成湯受命列爲三代而

前漢書 紀 卷之七 十一
祭祀廢絕考求其後莫正孔吉其封吉爲殷紹嘉侯
三月進爵爲公及周承休侯皆爲公地各百里行幸
雍祠五時夏四月以大司馬票騎大將軍爲大司馬
罷將軍官御史大夫爲大司空封爲列侯益大司馬
大司空奉如丞相秋八月庚戌中山王興薨冬十一
月立楚孝王孫景爲定陶王定陵侯淳于長大逆不
道下獄死廷尉孔光使持節賜貴人許氏藥飲藥死
十二月罷部刺史更置州牧秩二千石

二年春正月行幸甘泉郊泰畤二月壬子丞相翟方
進薨三月行幸河東祠后土丙戌帝崩于未央宮皇

太后詔有司復長安南北郊四月己卯葬延陵

贊曰臣之姑克後宮爲婕妤父子昆弟侍帷幄數爲
臣言成帝善修容儀升車正立不內顧不疾言不親
指臨朝淵嘿尊嚴若神可謂穆穆天子之容者矣博
覽古今容受直辭公卿稱職奏議可述遭世承平上
下和睦然湛于酒色趙氏亂內外家擅朝言之可爲
於邑建始以來王氏始執國命哀平短祚莽遂篡位
蓋其威福所由來者漸矣

前漢書卷第十

前漢書卷第十一

哀帝紀十一

孝哀皇帝元帝庶孫定陶恭王子也母曰丁姬年三
歲嗣立爲王長好文辭法律元延四年入朝盡從傅
相中尉時成帝少弟中山孝王亦來朝獨從傅上怪
之以問定陶王對曰令諸侯王朝得從其國二千石
傅相中尉皆國二千石故盡從之上令誦詩通習能
說他日問中山王獨從傅在何法令不能對令誦尚
書又廢及賜食於前後飽起下鞮繫解成帝由此以
爲不能而賢定陶王數稱其材時王祖母傅太后隨

王來朝私賂遺上所幸趙昭儀及帝舅票騎將軍曲陽侯王根昭儀及根見上亡子亦欲豫自結爲長久計皆更稱定陶王勸帝以爲嗣成帝亦自羨其材爲加元服而遣之時年十七矣明年使執金吾任宏守大鴻臚持節徵定陶王立爲皇太子謝曰臣幸得繼父守藩爲諸侯王材質不足以假克太子之官陛下聖德寬仁敬承祖宗奉順神祇宜蒙福祐子孫千億之報臣願且得留國邸旦夕奉問起居俟有聖嗣歸國守藩書奏天子報聞後月餘立楚孝王孫景爲定陶王奉恭王祀所以獎勵太子專爲後之誼語在外

戚傳綏和二年三月成帝崩四月丙午太子卽皇帝位謁高廟尊皇太后曰太皇太后皇后曰皇太后大赦天下賜宗室王子有屬者馬各一駟吏民爵百戶牛酒三老孝弟力田鰥寡孤獨帛太皇太后詔尊定陶恭王爲恭皇五月丙戌立皇后傳氏詔曰春秋母以子貴尊定陶太后曰恭皇太后丁姬曰恭皇后各置左右詹事食邑如長信宮中宮追尊傅父爲崇祀侯丁父爲褒德侯封舅丁明爲陽安侯舅子滿爲平周侯追謚滿父忠爲平周懷侯皇后父晏爲孔鄉侯皇太后弟侍中光祿大夫趙欽爲新成侯六月詔曰

前漢書 卷十一
鄭聲淫而亂樂聖王所放其罷樂府曲陽侯根前以大司馬建社稷策益封二千戶太僕安陽侯舜輔導有舊恩益封五百戶及丞相孔光大司空汜鄉侯何武益封各千戶詔曰河間王良喪太后三年爲宗室儀表益封萬戶又曰制節謹度以防奢淫爲政所先百王不易之道也諸侯王列侯公主吏二千石及豪富民多畜奴婢田宅亡限與民爭利百姓失職重困不足其議限列有司條奏諸王列侯得名田國中列侯在長安及公主名田縣道關內侯吏民名田皆無得過三十頃諸侯王奴婢二百人列侯公主百人關

內侯吏民三十人年六十以上十歲以下不在數中賈人皆不得名田爲吏犯者以律論諸名田畜奴婢過品皆沒入縣官齊三服官諸官織綺繡難成害女紅之物皆止無作輸除任子令及誹謗詆欺法掖庭宮人年三十以下出嫁之官奴婢五十以上免爲庶人禁郡國無得獻名獸益吏三百石以下奉察吏殘賊酷虐者以時退有司無得舉赦前往事博士弟子父母死予寧三年秋曲陽侯王根成都侯王況皆有罪根就國況免爲庶人歸故郡詔曰朕承宗廟之重戰戰兢兢懼失天心間者日月亡光五星失行郡國

前漢書 卷一
比比地動廼者河南潁川郡水出流殺人民壞敗廬舍朕之不德民反蒙辜朕甚懼焉已遣光祿大夫循行舉籍賜死者棺錢人三千其令水所傷縣邑及他郡國災害什四以上民貲不滿十萬皆無出今年租賦

建平元年春正月赦天下侍中騎都尉新成侯趙欽成陽侯趙訢皆有罪免爲庶人徙遼西太皇太后詔外家王氏田非冢塋皆以賦貧民二月詔曰蓋聞聖王之治以得賢爲首其與大司馬列侯將軍中二千石州牧守相舉孝弟惇厚能直言通政事延于側陋

可親民者各一人三月賜諸侯王公主列侯丞相將軍中二千石中都官郎吏金錢帛各有差冬中山孝王太后媛弟宜鄉侯馮參有罪皆自殺

二年春三月罷大司空復御史大夫夏四月詔曰漢家之制推親親以顯尊尊定陶恭皇之號不宜復稱定陶尊恭皇太后曰帝太太后稱永信宮恭皇后曰帝太后稱中安宮立恭皇廟于京師赦天下徒罷州牧復刺史六月庚申帝太后丁氏崩上曰朕聞夫婦一體詩云穀則異室死則同穴昔季武子成寢杜氏之殯在西階下請合葬而許之附葬之禮自周興焉

前漢書 卷一
郁郁乎文哉吾從周孝子事亾如事存帝太后宜起
陵恭皇之園遂葬定陶發陳留濟陰近郡國五萬人
穿復土待詔夏賀良等言赤精子之讖漢家歷運中
衰當再受命宜改元易號詔曰漢興二百載歷數開
元皇天降非材之佑漢國再獲受命之符朕之不德
曷敢不通夫基事之元命必與天下自新其大赦天
下以建平二年爲太初元將元年號曰陳聖劉太平
皇帝漏刻以百二十爲度七月以渭城西北原上永
陵亭部爲初陵勿徙郡國民使得自安八月詔曰待
詔夏賀良等建言改元易號增益漏刻可以永安國

家朕過聽賀良等言冀爲海內獲福卒亡嘉應皆違
經背古不合時宜六月甲子制書非赦令也皆蠲除
之賀良等反道惑衆下有司皆伏辜丞相博御史大
夫玄孔鄉侯晏有罪博自殺玄減死二等論晏削戶
四分之一語在博傳

三年春正月立廣德夷王弟廣漢爲廣平王癸卯帝
太太后所居桂宮正殿火三月巳酉丞相當薨有星
孛于河鼓夏六月立魯頃王子郃鄉侯閔爲王冬十
一月壬子復甘泉泰畤汾陰后土祠罷南北郊東平
王雲雲后謁安成恭侯夫人放皆有罪雲自殺謁放

奔市

四年春大旱關東民傳行西王母壽經歷郡國西入關至京師民又會聚祠西王母或夜持火上屋擊鼓號呼相驚恐二月封帝太太后從弟侍中傅商爲汝昌侯太后同母弟子侍中鄭業爲陽信侯三月侍中駙馬都尉董賢光祿大夫息夫躬南陽太守孫寵皆以告東平王封列侯語在賢傳夏五月賜中二千石至六百石及天下男子爵六月尊帝太太后爲皇太太后秋八月恭皇園北門災冬詔將軍中二千石舉明兵法有大慮者

元壽元年春正月辛丑朔日有蝕之詔曰朕獲保宗廟不明不敏宿夜憂勞未皇寧息惟陰陽不調元元不瞻未睹厥咎婁敕公卿庶幾有望至今有司執法未得其中或上暴虐假執獲名溫良寬柔陷於亡滅是故殘賊彌長和睦日衰百姓愁怨靡所錯躬迺正月朔日有蝕之厥咎不遠在余一人公卿大夫其各悉心勉帥百寮敦任仁人黜遠殘賊期於安民陳朕之過失無有所諱其與將軍列侯中二千石舉賢良方正能直言者各一人大赦天下丁巳皇太太后傅氏崩三月丞相嘉有罪下獄死秋九月大司馬票騎

前漢書 卷二十一
將軍丁明免孝元廟殿門銅龜蛇鋪首鳴

元壽二年春正月匈奴單于烏孫大昆彌來朝二月
歸國單于不說語在匈奴傳夏四月壬辰晦日有蝕
之五月正三公官分職大司馬衛將軍董賢爲大司
馬丞相孔光爲大司徒御史大夫彭宣爲大司空封
長平侯正司直司隸造司寇職事未定六月戊午帝
崩于未央宮秋九月壬寅葬義陵

贊曰孝哀自爲藩王及克太子之宮文辭博敏幼有
令聞睹孝成世祿去王室權柄外移是故臨朝婁誅
大臣欲彊主威以則武宣雅性不好聲色時覽下射
武戲卽位痿痺末年滯劇饗國不永哀哉

前漢書卷第十一

前漢書卷第十二

平帝紀十二

孝平皇帝元帝庶孫中山孝王子也母曰衛姬年三
 歲嗣立為王元壽二年六月哀帝崩太皇太后詔曰
 大司馬賢年少不合眾心其上印綬罷賢即日自殺
 新都侯王莽為大司馬領尚書事秋七月遣車騎將
 軍王舜大鴻臚左咸使持節迎中山王辛卯貶皇太
 后趙氏為孝成皇后退居北宮哀帝皇后傅氏退居
 桂宮孔鄉侯傅晏少府董恭等皆免官爵徙合浦九
 月辛酉中山王即皇帝位謁高廟大赦天下帝年九

歲太皇太后臨朝大司馬莽秉政百官總已以聽於莽詔曰夫赦令者將與天下更始誠欲令百姓改行絜已全其性命也往者有司多舉奏赦前事累增罪過誅陷亡辜殆非重信慎刑洒心自新之意也及選舉者其歷職更事有名之士則以爲難保廢而弗舉甚謬於赦小過舉賢材之義諸有臧及內惡未發而薦舉者皆勿案驗令士厲精鄉進不以小疵妨大材自今以來有司無得陳赦前事置奏上有不如詔書爲虧恩以不道論定著令布告天下使明知之

元始元年春正月越裳氏重譯獻白雉一黑雉二詔使三公以薦宗廟羣臣奏言大司馬莽功德比周公賜號安漢公及太師孔光等皆益封語在莽傳賜天下民爵一級吏在位二百石以上一切滿秩如真立故東平王雲太子開明爲王故桃鄉頃侯子成都爲中山王封宣帝耳孫信等三十六人皆爲列侯太僕王暉等二十五人前議定陶傅太后尊號守經法不阿指從邪右將軍孫建爪牙大臣大鴻臚咸前正議不阿從奉節使迎中山王及宗正劉不惡執金吾任岑中郎將孔永尚書令姚恂沛郡太守石詡皆以前與建策東迎卽位奉事周密勤勞賜爵關內侯食邑

各有差賜帝徵卽位前所過縣邑吏二千石以下至
佐史爵各有差又令諸侯王公列侯關內侯亡子而
有孫若子同產子者皆得以爲嗣公列侯嗣子有罪
耐以上元請宗室屬未盡而以罪絕者復其屬其爲
吏舉薦佐史補四百石天下吏比二千石以上年老
致仕者參分故祿以一與之終其身遺諫大夫行三
輔舉籍吏民以元壽二年倉卒時橫賦歛者償其直
義陵民冢不妨殿中者勿發天下吏舍亡得置什器
儲待二月置義和官秩二千石外史閭師秩六百石
班教化禁淫祀放鄭聲乙未義陵寢神衣在柙中丙

申旦衣在外牀上寢令以急變聞用太牢祠夏五月
丁巳朔日有蝕之大赦天下公卿將軍中二千石舉
敦厚能直言者各一人六月使少傅左將軍豐賜帝
母中山孝王姬璽書拜爲中山孝王后賜帝舅衛寶
寶弟玄爵關內侯賜帝女弟四人號皆曰君食邑各
二千戶封周公後公孫相如爲褒魯侯孔子後孔均
爲褒成侯奉其祀追諡孔子曰褒成宣尼公罷明光
宮及三輔馳道天下女徒已論歸家顧山錢月三百
復貞婦鄉一人置少府海丞果丞各一人大司農部
丞十三人人部一州勸農桑太皇太后省所食湯沐

邑十縣屬大司農常別計其租入以贍貧民秋九月赦天下徒以中山苦陘縣爲中山孝王后湯沐邑二年春黃支國獻犀牛詔曰皇帝二名通于器物今更名合於古制使太師光奉太牢告祠高廟夏四月立代孝王玄孫之子如意爲廣宗王江都易王孫旰台侯宮爲廣川王廣川惠王曾孫倫爲廣德王封故大司馬博陸侯霍光從父昆弟曾孫陽宣平侯張敖玄孫慶忌絳侯周勃玄孫共舞陽侯樊噲玄孫之子章皆爲列侯復爵賜故曲周侯酈商等後玄孫酈明友等百一十三人爵關內侯食邑各有差郡國大旱

蝗青州尤甚民流亡安漢公四輔三公卿大夫吏民爲百姓困乏獻其田宅者二百三十人以口賦貧民遣使者捕蝗民捕蝗詣吏以石斗受錢天下民貲不滿二萬及被災之郡不滿十萬勿租稅民疾疫者舍空邸第爲置醫藥賜死者一家六尸以上葬錢五千四尸以上三千二尸以上二千罷安定呼沱苑以爲安民縣起官寺市里募徙貧民縣次給食至徙所賜田宅什器假與犁牛種食又起五里於長安城中宅二百區以居貧民秋舉勇武有節明兵法郡一人詣公車九月戊申晦日有蝕之赦天下徒使謁者大司

前漢書 卷二
四
馬掾四十四人持節行邊兵遣執金吾候陳茂假以
鉦鼓募汝南南陽勇敢吏士三百人論說江湖賊成
重等二百餘人皆自出送家在所收事重徙雲陽賜
公田宅冬中二千石舉治獄平歲一人
三年春詔有司爲皇帝納采安漢公莽女語在莽傳
又詔光祿大夫劉歆等禱定婚禮四輔公卿大夫博
士郎吏家屬皆以禮娶親迎立輅併馬夏安漢公奏
車服制度吏民養生送終嫁娶奴婢田宅器械之品
立官稷及學官郡國曰學縣道邑侯國曰校校學置
經師一人鄉曰庠聚曰序序庠置孝經師一人陽陵

任橫等自稱將軍盜庫兵攻官寺出囚徒大司徒掾
督逐皆伏辜安漢公世子宇與帝外家衛氏有謀宇
下獄死誅衛氏

四年春正月郊祀高祖以配天宗祀孝文以配上帝
改殷紹嘉公曰宋公周承休公曰鄭公詔曰蓋夫婦
正則父子親人倫定矣前詔有司復貞婦歸女徒誠
欲以防邪辟全貞信及眊悼之人刑罰所不加聖王
之所制也惟苛暴吏多拘繫犯法者親屬婦女老弱
搆怨傷化百姓苦之其明敕百寮婦女非身犯法及
男子年八十以上七歲以下家非坐不道詔所名捕

前漢書 卷二
三
它皆無得繫其當驗者卽驗問定著今二月丁未立
皇后王氏大赦天下遣太僕王暉等八人置副假節
分行天下覽觀風俗賜九卿已下至六百石宗室有
屬籍者爵自五大夫以上各有差賜天下民爵一級
鰥寡孤獨高年帛夏皇后見于高廟加安漢公號曰
宰衡賜公太夫人號曰功顯君封公子安臨皆爲列
侯安漢公奏立明堂辟廡尊孝宣廟爲中宗孝元廟
爲高宗天子世世獻祭冬置西海郡徙天下犯禁者
處之梁王立有罪自殺分京師置前煇光後丞烈二
郡更公卿大夫八十一元士官名位次及十二州名

分界郡國所屬罷置改易天下多事吏不能紀冬大
風吹長安城東門屋瓦且盡

五年春正月祿祭明堂諸侯王二十八人列侯百二
十人宗室子九百餘人徵助祭禮畢皆益戶賜爵及
金帛增秩補吏各有差詔曰蓋聞帝王以德撫民其
次親親以相及也昔堯睦九族舜惇叙之朕以皇帝
幼年且統國政惟宗室子皆太祖高皇帝子孫及兄
弟吳頃楚元之後漢元至今十有餘萬人雖有王侯
之屬莫能相糾或陷入刑罪教訓不至之咎也傳不
云乎君子篤於親則民興於仁其爲宗室自太上皇

以來族親各以世氏郡國置宗師以糾之致教訓焉
二千石選有德義者以爲宗師考察不從教令有寃
失職者宗師得因郵亭書言宗伯請以聞常以歲正
月賜宗師帛各十匹義和劉歆等四人使治明堂辟
廡今漢與文王靈臺周公作洛同符太僕王暉等八
人使行風俗宣明德化萬國齊同皆封爲列侯徵天
下通知逸經古記天文歷算鍾律小學史篇方術本
草及以五經論語孝經爾雅教授者在所爲駕一封
輅傳遣詣京師至者數千人閏月立梁孝王玄孫之
耳孫音爲王冬十二月丙午帝崩于未央宮大赦天
下有司議曰禮臣不殤君皇帝年十有四歲宜以禮
歛加元服奏可葬康陵詔曰皇帝仁惠無不顧哀每
疾一發氣輒上逆害於言語故不及有遺詔其出媵
妾皆歸家得嫁如孝文時故事
贊曰孝平之世政自莽出褒善顯功以自尊盛觀其
文辭方外百蠻亡思不服休徵嘉應頌聲竝作至乎
變異見於上民怨於下莽亦不能文也

前漢書卷第十二

前漢書卷第十三

漢 蘭臺令扶風班固撰
明 後學新安吳勉學校

異姓諸侯王表八

昔詩書述虞夏之際舜禹受禪積德累功洽于百姓
攝位行政考之于天經數年十然後在位殷周之王
乃繇高稷修仁行義歷十餘世至于湯武然後放殺
秦起襄公章文繆獻孝昭嚴稍蠶食六國百有餘載
至始皇乃并天下以德若彼用力如此其艱難也秦
既稱帝患周之敗以為起於處士橫議諸侯力爭四

前漢書卷第十三
夷交侵以弱見奪於是削去五等墮城銷刃箝語燒
書內鋤雄俊外攘胡粵用壹威權爲萬世安然十餘
年間猛敵橫發乎不虞適戍疆於五伯間閭偏於戎
狄嚮應瘠於謗議奮臂威於甲兵鄉秦之禁適所以
資豪傑而速自斃也是以漢亡尺土之階繇一劍之
任五載而成帝業書傳所記未嘗有焉何則古世相
革皆承聖王之烈今漢獨收孤秦之弊鐫金石者難
爲功摧枯朽者易爲力其執然也故據漢受命譜十
八王月而列之天下一統乃以年數訖于孝文異姓
盡矣

前漢書卷第十三

前漢書卷第十四

諸侯王表二

昔周監於二代三聖制法立爵五等封國八百同姓
五十有餘周公康叔建於魯衛各數百里太公於齊
亦五侯九百之地詩載其制曰介人惟藩大師惟垣
大邦惟屏太宗惟翰懷德惟寧宗子惟城母俾城壞
毋獨斯畏所以親親賢賢褒表功德關諸盛衰深根
固本爲不可拔者也故盛則周邵相其治致刑錯衰
則五伯扶其弱與共守自幽平之後日以陵夷至乎
隄隴河洛之間分爲二周有逃責之臺被竊鈇之言

前漢書 卷四
然天下謂之共主疆大弗之敢傾歷載八百餘年數
極德盡既於王赧降爲庶人用天年終號位已絕於
天下尚猶枝葉相持莫得居其虛位海內無主三十
餘年秦據執勝之地騁狙詐之兵蠶食山東壹切取
勝因矜其所習自任私知姍咲三代盪滅古法竊自
號爲皇帝而子弟爲疋夫內亡骨肉本根之輔外亡
尺土藩翼之衛陳吳奮其白挺劉項隨而斃之故曰
周過其歷秦不及期國執然也漢興之初海內新定
同姓寡少懲戒亡秦孤立之敗於是剖裂疆土立二
等之爵功臣侯者百有餘邑尊王子弟大啟九國自

鴈門以東盡遼陽爲燕代常山以南太行左轉渡河
濟漸于海爲齊趙穀泗以往奄有龜蒙爲梁楚東帶
江湖薄會稽爲荆吳北界淮瀕略廬衡爲淮南波漢
之陽亘九嶷爲長沙諸侯比境周市三垂外接胡越
天子自有三河東郡潁川南陽自江陵以西至巴蜀
北自雲中至隴西與京師內史凡十五郡公主列侯
頗邑其中而藩國大者夸州兼郡連城數十宮室百
官同制京師可謂橋枉過其正矣雖然高祖創業日
不暇給孝惠享國又淺高后女主攝位而海內晏如
亡狂狡之憂卒折諸呂之難成大宗之業者亦賴之

於諸侯也然諸侯原本以大末流濫以致溢小者淫
荒越法大者睽孤橫逆以害身喪國故文帝采賈生
之議分齊趙景帝用鼂錯之計削吳楚武帝施主父
之冊下推恩之令使諸侯王得分戶邑以封子弟不
行黜陟而藩國自析自此以來齊分爲七趙分爲六
梁分爲五淮南分爲三皇子始立者大國不過十餘
城長沙燕代雖有舊名皆亡南北邊矣景遭七國之
難抑損諸侯減黜其官武有衡山淮南之謀作左官
之律設附益之法諸侯惟得衣食稅租不與政事至
於哀平之際皆繼體苗裔親屬踈遠生於帷墻之中

不爲士民所尊執與富室亡異而本朝短世國統三
絕是故王莽知漢中外殫微本末俱弱亡所忌憚生
其姦心因母后之權假伊周之稱顓作威福廟堂之
上不降階序而運天下詐謀旣成遂據南面之尊分
遣五威之吏馳傳天下班行符命漢諸侯王厥角齟
首奉上璽轂惟恐在後或乃稱美頌德以求容媚豈
不哀哉是以究其終始彊弱之變明監戒焉

前漢書卷第十四

前漢書卷第十五

王子侯表三上

大哉聖祖之建業也後嗣承序以廣親親至於孝武
 以諸侯王疆土過制或替差失軌而子弟為匹夫輕
 重不相準於是制詔御史諸侯王或欲推私恩分子
 弟邑者令各條上朕且臨定其號名自是支庶畢侯
 矣詩云文王孫子本支百世信矣哉

前漢書卷第十五

前漢書卷第十五

王子侯表三下

孝元之世亡王子侯者盛衰終始豈非命哉元始之際王莽擅朝偽褒宗室侯及王之孫焉居攝而愈多非其正故弗錄旋種亦絕悲矣

前漢書卷第十五

前漢書卷第十六

高惠高后文功臣表四

自古帝王之興曷嘗不建輔弼之臣所與共成天功者乎漢興自秦二世元年之秋楚陳之歲初以沛公總帥雄俊三年然後西滅秦立漢王之號五年東克項羽卽皇帝位八載而天下乃平始論功而定封訖十二年侯者百四十有三人時大城名都民人散亾戶口可得而數裁什二三是以大侯不過萬家小者五六百戶封爵之誓曰使黃河如帶泰山若厲國以永存爰及苗裔於是申以丹書之信重以白馬之盟

前漢書表卷六
又作十八侯之位次高后二年復詔丞相陳平盡差
列侯之功錄第下竟臧諸宗廟副在有司始未嘗不
欲固根本而枝葉稍落也故逮文景四五世間流民
既歸戶口亦息列侯大者至三四萬戶小國自倍富
厚如之子孫驕逸忘其先祖之艱難多陷法禁墮命
亡國或云子孫訖于孝武後元之年靡有子遺耗矣
罔亦少密焉故孝宣皇帝愍而錄之乃開廟臧覽舊
籍詔令有司求其子孫咸出庸保之中並受復除或
加以金帛用章中興之德降及孝成復加卹問稍益
衰微不絕如綫善乎杜業之納說也曰昔唐以萬國

致時雍之政虞夏以之多羣后饗共已之治湯法三
聖殷氏太平周封八百重譯來賀是以內恕之君樂
繼絕世隆名之主安立亡國至於不及下車德念深
矣成王察牧野之克顧群后之勤知其恩結於民心
功光於王府也故追述先父之志錄遺老之策高其
位大其寓愛敬飭盡命賜備厚大孝之隆於是爲至
至其沒也世主歎其功無民而不思所息之樹且猶
不伐况其廟乎是以燕齊之祀與周並傳子繼弟及
歷載不墮豈無刑辟繇祖之竭力故支庶賴焉迹漢
功臣亦皆割符世爵受山河之誓存以著其號亡以

前漢書卷第十六
顯其魂賞亦不細矣百餘年間而襲封者盡或絕失
姓或乏無主朽骨孤於墓苗裔流於道生爲愍隸死
爲轉屍以往况今甚可悲傷聖朝憐閔詔求其後四
方忻忻靡不歸心出入數年而不省察恐議者不思
大義設言虛亡則厚德掩息遶東布章非所以視化
勸後也三人爲衆雖難盡繼宜從尤功於是成帝復
紹蕭何哀平之世增修曹參周勃之屬得其宜矣以
綴續前記究其本末并序位次盡于孝文以昭元功
之侯籍云

前漢書卷第十六

前漢書卷第十七

景武昭宣元成功臣表五

昔書稱蠻夷帥服詩云徐方旣徠春秋列潞子之爵
許其慕諸夏也漢興至于孝文時乃有弓高襄城之
封雖自外徠本功臣後故至孝景始欲侯降者丞相
周亞夫守約而爭帝黜其議初開封賞之科又有吳
楚之事武興胡越之伐將帥受爵應本約矣後世承
平頗有勞臣輯而序之續元功次云

前漢書卷第十七

前漢書卷第十八

外戚恩澤侯表六

自古受命及中興之君必興滅繼絕修廢舉逸然後天下歸仁四方之政行焉傳稱武王克殷追存賢聖至乎不及下車世代雖殊其揆一也高帝撥亂誅暴庶事草創日不暇給然猶修祀六國求聘四皓過魏則寵無忌之墓適趙則封樂毅之後及其行賞而授位也爵以功爲先後官用能爲次序後嗣共已遵業舊臣繼踵居位至乎孝武元功宿將略盡會上亦興文學進拔幽隱公孫弘自海瀕而登宰相於是寵以

前漢書卷第十八
列侯之爵又疇咨前代詢問耆老初得周後復加爵
邑自是之後宰相畢侯矣元成之間晚得殷世以備
賓位漢興外戚與定天下侯者二人故誓曰非劉氏
不王若有亡功非上所置而侯者天下共誅之是以
高后欲王諸呂王陵廷爭孝景將侯王氏修侯犯色
率用廢黜是後薄昭竇嬰上官衛霍之侯以功受爵
其餘后父據春秋褒紀之義帝舅緣大雅申伯之意
滯廣博矣是以別而叙之

前漢書卷第十八

前漢書卷第十九

百官公卿表七

易叙宓戲神農黃帝作教化民而傳述其官以爲宓
羲龍師名官神農火師火名黃帝雲師雲名少昊鳥
師鳥名自顓頊以來爲民師而命以民事有重黎句
芒祝融后土蓐收玄冥之官然已上矣書載唐虞之
際命羲和四子順天文授民時咨四岳以舉賢材揚
側陋十有二牧柔遠能邇禹作司空平水土棄作后
稷播百穀高作司徒敷五教咎繇作士正五刑垂作
共工利器用益作朕虞育草木鳥獸伯夷作秩宗典

三禮夔典樂和神人龍作納言出入帝命夏殷亡聞
焉周官則備矣天官冢宰地官司徒春官宗伯夏官
司馬秋官司寇冬官司司空是爲六卿各有徒屬職分
用於百事太師太傅大保是爲三公蓋參天子坐而
議政無不總統故不以一職爲官名又立三少爲之
副少師少傅少保是爲孤卿與六卿爲九焉記曰三
公無官言有其人然後充之舜之於堯伊尹於湯周
公召公於周是也或說司馬主天司徒主人司空主
土是爲三公四岳謂四方諸侯自周衰官失而百職
亂戰國並爭各變異秦兼天下建皇帝之號立百官

之職漢因循而不革明簡易隨時宜也其後頗有所
改王莽篡位慕從古官而吏民弗安亦多虐政遂以
亂亡故略表舉大分以通古今備溫故知新之義云
相國丞相皆秦官金印紫綬掌丞天子助理萬機秦
有左右高帝卽位置一丞相十一年更名相國綠綬
孝惠高后置左右丞相文帝二年復置一丞相有兩
長史秩千石哀帝元壽二年更名大司徒武帝元狩
五年初置司直秩比二千石掌佐丞相舉不法
太尉秦官金印紫綬掌武事武帝建元二年省元狩
四年初置大司馬以冠將軍之號宣帝地節三年置

大司馬不冠將軍亦無印綬官屬成帝綏和元年初
賜大司馬金印紫綬置官屬祿比丞相去將軍哀帝
建平二年復去大司馬印綬官屬冠將軍如故元壽
二年復賜大司馬印綬置官屬去將軍位在司徒上
有長史秩千石
御史大夫秦官位上卿銀印青綬掌副丞相有兩丞
秩千石一曰中丞在殿中蘭臺掌圖籍秘書外督部
刺史內領侍御史員十五人受公卿奏事舉劾按章
成帝綏和元年更名大司空金印紫綬祿比丞相置
長史如中丞官識如故哀帝建平二年復爲御史大

夫元壽二年復爲大司空御史中丞更名御史長史
侍御史有繡衣直指出討姦猾治大獄武帝所制不
常置

大傅古官高后元年初置金印紫綬後省八年復置
後省哀帝元壽二年復置位在三公上

太師太保皆古官平帝元始元年皆初置金印紫綬
太師位在太傅上太保次太傅

前後左右將軍皆周末官秦因之位上卿金印紫綬
漢不常置或有前後或有左右皆掌兵及四夷有長
史秩千石

前漢書卷九
奉常秦官掌宗廟禮儀有丞景帝中六年更名太常
屬官有大樂太祝太宰太史太卜太醫六令丞又均
官都水兩長丞又諸廟寢園食官令長丞又靡太宰
太祝令丞五時各一尉又博士及諸陵縣皆屬焉景
帝中六年更名太祝爲祠祀武帝太初元年更曰廟
祀初置太卜
博士秦官掌通古今秩比六百石員多至數十人武
帝建元五年初置五經博士宣帝黃龍元年稍增員
十二人元帝永光元年分諸陵邑屬三輔王莽改太
常曰秩宗

郎中令秦官掌宮殿掖門戶有丞武帝太初元年更
名光祿勳屬官有大夫郎謁者皆秦官又期門羽林
皆屬焉

大夫掌論議有太中大夫中大夫諫大夫皆無員多
至數十人武帝元狩五年初置諫大夫秩比八百石
太初元年更名中大夫爲光祿大夫秩比二千石大
中大夫秩比千石如故

郎掌守門戶出充車騎有議郎中郎侍郎郎中皆無
員多至千人議郎中郎秩比六百石侍郎郎中皆無
郎中比三百石中郎有五官左右三將秩皆比二千

前漢書 卷九
石郎中有車戶騎三將秩皆比千石

謁者掌賓讚受事員七十人秩比六百石有僕射秩比千石

期門掌執兵送從武帝建元三年初置比卽無員多至千人有僕射秩比千石平帝元始元年更名虎賁郎置中郎將秩二千石

羽林掌送從次期門武帝太初元年初置名曰建章營騎後更名羽林騎又取從軍死事之子孫養羽林官教以五兵號曰羽林孤兒羽林有令丞宣帝中郎將騎都尉監羽林秩比二千石

僕射秦官自侍中尚書博士郎皆有古者重武官有主射以督課之軍屯吏騶宰永巷宮人皆有取其領事之號衛尉秦官掌宮門衛屯兵有丞景帝初更名中大夫令後元年復爲衛尉屬官有公車司馬衛士旅賁三令丞衛士三丞又諸屯衛候司馬二十二官皆屬焉長樂建章甘泉衛尉皆掌其官職略同不常置

太僕秦官掌輿馬有兩丞屬官有大廐未央家馬三令各五丞一尉又車府路軫騎馬駿馬四令丞又龍馬閑駒橐泉駒駮丞華五監長丞又邊郡六牧師苑

令各三丞又牧橐昆蹏令丞皆屬焉
中太僕掌皇太后輿馬不常置也武帝太初元年更
名家馬爲桐馬初置路軫

廷尉秦官掌刑辟有正左右監秩皆千石景帝中六
年更名大理武帝建元四年復爲廷尉宣帝地節三
年初置左右平秩皆六百石哀帝元壽二年復爲大
理王莽改曰作士

典客秦官掌諸歸義蠻夷有丞景帝中六年更名大
行令武帝太初元年更名大鴻臚屬官有行人譯官
別火三令丞及郡邸長丞武帝太初元年更名行人

爲大行令初置別火王莽改大鴻臚曰典樂初置郡
國邸屬少府中屬中尉後屬大鴻臚

宗正秦官掌親屬有丞平帝元始四年更名宗伯屬
官有都司空令丞內官長丞又諸公主家令門尉皆
屬焉王莽并其官於秩宗初內官屬少府中屬主爵
後屬宗正

治粟內史秦官掌穀貨有兩丞景帝後元年更名大
農令武帝太初元年更名大司農屬官有太倉均輸
平準都內籍田五令丞幹官鐵市兩長丞又郡國諸
倉農監都水六十五官長丞皆屬焉驥粟都尉武帝

軍官不常置王莽改大司農曰義和後更為納言初
幹官屬少府中屬主爵後屬大司農
少府秦官掌山海池澤之稅以給共養有六丞屬官
有尚書符節太醫太官湯官導官樂府若盧考工室
左弋居室甘泉居室左右司空東織西織東園匠十
二官令丞又胞人都水均官三長丞又上林中十池
監又中書謁者黃門鉤盾尚方御府永巷內者宦者
八官令丞諸僕射署長中黃門皆屬焉武帝太初元
年更名考工室為考工左弋為飲飛居室為保宮甘
泉居室為昆臺永巷為掖廷飲飛掌弋射有九丞兩

尉太官七丞昆臺五丞樂府三丞掖廷八丞宦者七
丞鉤盾五丞兩尉成帝建始四年更名中書謁者令
為中謁者令初置尚書員五人有四丞河平元年省
東織更名西織為織室綏和二年哀帝省樂府王莽
改少府曰共工

中尉秦官掌徼循京師有兩丞候司馬千人武帝太
初元年更名執金吾屬官有中壘寺互武庫都船四
令丞都船武庫有三丞中壘兩尉又式道左右中候
候丞及左右京輔都尉尉丞兵卒皆屬焉初寺互屬
少府中屬主爵後屬中尉自太常至執金吾秩皆中

二千石丞皆千石

太子太傅少傅古官屬官有太子門大夫庶子先馬舍人

將作少府秦官掌治宮室有兩丞左右中候景帝中六年更名將作大匠屬官有石庫東園主章左右前後中校七令丞又主章長丞武帝太初元年更名東園主章爲木工成帝陽朔三年省中候及左右前後中校五丞

詹事秦官掌皇后太子家有丞屬官有太子率更家令丞僕中盾衛率厨廐長丞又中長秋私府永巷倉廐祠祀食官令長丞諸宦官皆屬焉成帝鴻嘉二年省詹事官并屬大長秋

長信詹事掌皇太后宮景帝中六年更名長信少府平帝元始四年更名長樂少府

將行秦官景帝中六年更名大長秋或用中人或用士人

典屬國秦官掌蠻夷降者武帝元狩三年昆邪王降復增屬國置都尉丞候千人屬官九譯令成帝河平元年省并大鴻臚

水衡都尉武帝元鼎二年初置掌上林苑有五丞屬

官有上林均輸御羞禁圃輯濯鍾官技巧六廐辯銅
九官令丞又衡官水司空都水農倉又甘泉上林都
水七官長丞皆屬焉上林有八丞十二尉均輸四丞
御羞兩丞都水三丞禁圃兩尉甘泉上林四丞成帝
建始二年省技巧六廐官王莽改水衡都尉曰予虞
初御羞上林衡官及鑄錢皆屬少府

內史周官秦因之掌治京師景帝二年分置左內史
右內史武帝太初元年更名京兆尹屬官有長安市
厨兩令丞又都水鐵官兩長丞左內史更名左馮翊
屬官有廩犧令丞尉又左都水鐵官雲壘長安四市

四長丞皆屬焉

主爵中尉秦官掌列侯景帝中六年更名都尉武帝
太初元年更名右扶風治內史右地屬官有掌畜令
丞又有都水鐵官廐廡厨四長丞皆屬焉與左馮翊
京兆尹是為三輔皆有兩丞列侯更屬大鴻臚元鼎
四年更置三輔都尉都尉丞各一人自太子太傅至
右扶風皆秩二千石丞六百石

護軍都尉秦官武帝元狩四年屬大司馬成帝綏和
元年居大司馬府比司直哀帝元壽元年更名司寇
平帝元始元年更名護軍

前漢書 卷九
司隸校尉周官武帝征和四年初置持節從中都官
徒千二百人捕巫蠱督大姦猾後罷其兵察三輔三
河弘農元帝初元四年去節成帝元延四年省綏和
二年哀帝復置但爲司隸冠進賢冠屬大司空比司
直
城門校尉掌京師城門屯兵有司馬十二城門候中
壘校尉掌北軍壘門內外掌西域屯騎校尉掌騎士
步兵校尉掌上林苑門屯兵越騎校尉掌越騎長水
校尉掌長水宣曲胡騎又有胡騎校尉掌池陽胡騎
不常置射聲校尉掌待詔射聲士虎賁校尉掌輕車

凡八校尉皆武帝初置有丞司馬自司隸至虎賁校
尉秩皆二千石西域都護加官宣帝地節二年初置
以騎都尉諫大夫使護西域三十六國有副校尉秩
比二千石丞一人司馬候千人各二人戊巳校尉元
帝初元元年置有丞司馬各一人候五人秩比六百石
○奉車都尉掌御乘輿車駙馬都尉掌駙馬皆武帝
初置秩比二千石侍中左右曹諸吏散騎中常侍皆
加官所加或列侯將軍卿大夫將都尉尚書太醫太
官令至郎中亡員多至數十人侍中中常侍得入禁
中諸曹受尚書事諸吏得舉法散騎騎並乘輿車給

前漢書表卷十九
事中亦加官所加或大夫博士議郎掌顧問應對位次中常侍中黃門有給事黃門位從將大夫皆秦制爵一級曰公士二上造三簪裊四不更五大夫六官大夫七公大夫八公乘九五大夫十左庶長十一右庶長十二左更十三中更十四右更十五少上造十六大上造十七駟車庶長十八大庶長十九關內侯二十徹侯皆秦制以賞功勞徹侯金印紫綬避武帝諱曰通侯或曰列侯改所食國令長名相又有家丞門大夫庶子

諸侯王高帝初置金璽蓋綬掌治其國有太傅輔王內史治國民中尉掌武職丞相統衆官羣卿大夫都官如漢朝景帝中五年令諸侯王不得復治國天子爲置更改丞相曰相省御史大夫廷尉少府宗正博士官大夫謁者郎諸官長丞皆損其員武帝改漢內史爲京兆尹中尉爲執金吾郎中令爲光祿勳故王國如故損其郎中令秩千石改太僕曰僕秩亦千石成帝綏和元年省內史更令相治民如郡太守中尉如郡都尉

監御史秦官掌監郡漢省丞相遣史分刺州不常置武帝元封五年初置部刺史掌奉詔條察州秩六百

前漢書 卷九
石員十三人成帝綏和元年更名牧秩二千石哀帝
建平二年復爲刺史元壽二年復爲牧
郡守秦官掌治其郡秩二千石有丞邊郡又有長史
掌兵馬秩皆六百石景帝中二年更名太守
郡尉秦官掌佐守典武職甲卒秩比二千石有丞秩
皆六百石景帝中二年更名都尉

關都尉秦官農都尉屬國都尉皆武帝初置

縣令長皆秦官掌治其縣萬戶以上爲令秩千石至
六百石減萬戶爲長秩五百石至三百石皆有丞尉
秩四百石至二百石是爲長吏百石以下有斗食佐

史之秩是爲少吏大率十里一亭亭有長十亭一鄉
鄉有三老有秩嗇夫游徼三老掌教化嗇夫職聽訟
收賦稅游徼循禁賊盜縣大率方百里其民稠則
減稀則曠鄉亭亦如之皆秦制也列侯所食縣曰國
皇太后皇后公主所食曰邑有蠻夷曰道凡縣道國
邑千五百八十七鄉六千六百二十二亭二萬九千
六百三十五

凡吏秩比二千石以上皆銀印青綬光祿大夫無秩
比六百石以上皆銅印黑綬大夫博士御史謁者郎
無其僕射御史治書尚符璽者有印綬比二百石以

前漢書卷第十九
上皆銅印黃綬成帝陽朔二年除八百石五百石秩
綏和元年長相皆黑綬哀帝建平二年復黃綬吏員
自佐史至丞相十三萬二百八十五人

前漢書卷第十九

前漢書卷第二十

古今人表八

自書契之作先民可得而聞者經傳所稱唐虞以上
帝王有號謚輔佐不可得而稱矣而諸子頗言之雖
不考乎孔氏然猶著在篇籍歸乎顯善昭惡勸戒後
人故博采焉孔子曰若聖與仁則吾豈敢又曰何事
於仁必也聖乎未知焉得仁生而知之者上也學而
知之者次也困而學之又其次也困而不學民斯爲
下矣又曰中人以上可以語上也唯上智與下愚不
移傳曰譬如堯舜禹稷尚與之爲善則行鮌讎堯欲

與為惡則誅可與為善不可與為惡是謂上智桀紂
龍逢比干欲與之為善則誅于莘崇侯與之為惡則
行可與為惡不可與為善是謂下愚齊桓公管仲相
之則霸豎貂輔之則亂可與為善可與為惡是謂中
人因茲以列九等之序究極經傳繼世相次總備古
今之略要云

前漢書卷第二



